

清凉国师
华严疏鈔

初卷
功德品

律

C40
4514
(1)

C40-45-14

了翁上座請大猷及百
家書置之武州雲山
秋後采瑤院扈府中永
為學子者不敢許出院內
昔山二世鐵牛機謹誌



B 64853



大方廣佛華嚴經疏鈔卷十七之三

于闐國三藏沙門實又難陀 譯

清涼山大華嚴寺沙門澄觀撰述

初發心功德品第十七之二

佛子復置此喻。假使有人。於一念頃。以諸種種上味。飲食香華衣服幢旛傘蓋。及僧伽藍。上妙宮殿寶帳。網幔種種莊嚴師子之座。及眾妙寶供養東方無數諸佛。及無數世界所有眾生。恭敬尊重禮拜讚歎。曲躬瞻仰相續不絕。經無數劫。

疏第十一明供佛及生喻。文三。初舉喻。校量。二徵。

三釋。今初分二。前廣明一人。後畧辨九人。初中有四。一舉廣喻。二問。三答。四校量顯勝。初中有二。初廣說東方。後南西下。畧例九方。初中又二。先明佛在供養。後至佛滅下。明滅後供養。前中又二。先自行。後又勸下化他。前中有四深勝。一供具廣妙。二供田廣勝。謂無數界恭敬田故。三供心勝。恭敬等故。四供時勝。相續無數劫故。此自行已勝。况於教他。况復滅後。况於餘方。餘並可知。

又勸彼衆生。悉令如是供養於佛。至佛滅後。各爲起塔。其塔高廣。無數世界衆寶所成。種種莊嚴。一一塔中。各有無數如來形像。光明徧照。無數世界。經無數劫。南西北方四維上下。亦復如是。佛子。於汝意云何。此人功德。寧爲多不。天帝言。是人功德。唯佛乃知。餘無能測。佛子。此人功德。比菩薩初發心功德。百分不及一。千分不及一。百千分不及一。乃至優波尼沙陀分。亦不及一。

佛子。復置此喻。假使復有第二人。於一念中。能作前人及無數世界所有衆生。無數劫中供養之事。念念如是以無量種供養之具。供養無量諸佛如來。及無量世界所有衆生。經無量劫。其第三人。乃至第十人。

撰述
聖眉頂金卷三
二二
皆亦如是於一念中能作前人所有供養念念如是以無邊無等不可數不可稱不可思不可量不可說不可說不可說供養之具供養無邊乃至不可說不可說諸佛及爾許世界所有衆生經無邊乃至不可說不可說劫至佛滅後各爲起塔其塔高廣乃至在劫亦復如是。

疏後畧辨九人中二先舉廣喻二佛子下校量顯勝前中九人展轉遙望念敵多劫數量復增此中如第一人一念以無數供至第二人皆增至無量乃至第十增至不可說不可說皆積當位之念以

至當位極長時也。

佛子此前功德比菩薩初發心功德百分不及一。千分不及一。百千分不及一。乃至優波尼沙陀分亦不及一。

疏後校量可知。

何以故佛子菩薩摩訶薩不齊限但爲供養爾所佛故發阿耨多羅三藐三菩提心爲供養盡法界虛空界不可說不可說十方無量去來現在所有諸佛故發阿耨多羅三藐三菩提心。

疏二徵意云其第十人供福已至不可說不可說

撰述
全比容許不齊。何以不及少分。第三釋中分二。先
反顯不爲齊限。明前不及此。後爲供養盡法界下
順釋。以無限故。辨此過前。畧申十種。一時過。謂窮
三際。念劫重重時故。二處過。謂該十方。相卽入故。
三供過。謂盡法界稱理之供故。四田過。謂盡虛空
界塵毛等處。諸如來身。各充法界故。五心過。謂一
一念中。各以無盡供。供無盡佛。經無盡劫。心猶不
足故。六悲過。自作教他。以此善根。唯爲衆生。令先
成佛。我亦供養故。七智過了達三事。隨其一。一稱
法界故。如海一滴。則具百川之味。芥子之空。已無

分限。八善巧過。能以一事爲多。攝多爲一。善巧成
就融攝諸位。眞實行故。九所求過。唯爲菩提。不餘
趣故。十平等過。謂生佛自他。供與不供。皆平等故。
東上十義總不出三。一無齊限故。二稱法性故。三
事事無礙故。無此三義。設更重重廣喻。亦不及少
分。

發是心已。能知前際一切諸佛。始成正覺。及般涅槃。
能信後際一切諸佛。所有善根。能知現在一切諸佛
所有智慧。

疏第四發是心已下。就法畧示分。前喻顯大心因

廣此明攝德深勝亦是讚勝勸學。文中有二。一發是心已者。牒前諸喻所校量心。二能知下。明此大心所攝功德。於中有五。一解行圓滿。二妙果當成。三與佛平等。四能作佛事。五大智現前。初中三。一總舉所知。現佛正覺。但云智慧。過佛示滅。故加涅槃。當佛在因云善根也。過現已從緣。應可得云知未來未有。但可云信。亦信一切。皆當佛也。

彼諸佛所有功德。此菩薩能信。能受。能修。能得。能知。能證。能成就。能與諸佛平等一性。

疏二彼諸下。攝以修證。有爲能得。無爲能知。能證。使智身成就。法身等佛。古德判此一段爲攝位修成。謂於佛功德。智慧能信。是十信。信成就故。後攝初故。能受。是十住。能修。是十行。能知。是十向。得證。是十地。謂本智證。後智得。能成。是結。因究竟。能與佛等。是果滿平等。謂與佛能證所證平等無二。故初心卽攝諸位。乃至佛果。亦是一理。鈔古德判此一段。以爲攝位修成者。上直就初住之德。已爲深勝。今明攝位。卽初後圓融。不違經宗。事事無礙。亦是一理。

何以故。此菩薩爲不斷一切如來種性。故發心爲充。

徧一切世界故發心。爲度脫一切世界衆生故發心。爲悉知一切世界成壞故發心。爲悉知一切衆生垢淨故發心。爲悉知一切世界三有清淨故發心。爲悉知一切衆生心樂煩惱習氣故發心。爲悉知一切衆生死此生彼故發心。爲悉知一切衆生諸根方便故發心。爲悉知一切衆生心行故發心。爲悉知一切衆生三世智故發心。

疏三徵釋所以何以初心卽滿因位釋意云。以等真性所爲無齊限故。有十一句。初總餘別。文並同前初喻中辨。

以發心故。常爲三世一切諸佛之所憶念。當得三世一切諸佛無上菩提。卽爲三世一切諸佛與其妙法。卽與三世一切諸佛體性平等。已修三世一切諸佛助道之法。成就三世一切諸佛力無所畏。莊嚴三世一切諸佛不共佛法。悉得法界一切諸佛說法智慧。何以故。以是發心當得佛故。

疏第二以發心故下。妙果當成。分二。初標因所得。二徵釋所由。今初得於八事。一解契佛心故。爲憶念。二入正定聚故。當得菩提。三眞器已成。故佛授妙法。妙法者。卽如來知見也。四知心性故。與佛平

等五圓修助道。六度四攝六力等未證。亦定無疑。故云成就。七十八不共。修習莊嚴。八得四無礙辯。名說法智慧。上七皆言三世明其豎該。今云法界。辨其橫攝。前後影畧。二徵釋所由中。初徵意云。何以發心。卽得果法。釋云。以是發心爲因。決定當得佛故。望圓極之果。故定當成。約見性成智身。上品云。卽得故。晉經梵本。此中皆云。卽是佛故者。當此義也。鈔力等未證者。卽是偈意。偈云。菩薩於佛十力中。雖未證得。亦無疑。十八不共淨行品已說。望圓極之果等者。當得佛言。且順經文。分爲二義。

故引晉經梵本。則知當字。是譯人之意。譯人意欲不壞初後。故作此譯。若此意存。不壞初後。則前梵行品。初發心。卽得菩提。如何會釋。此改爲當。彼亦須改。彼成無妨。此卽何違。故此卽佛。正是梵行初心。卽成耳。且順彼釋。故云見性。卽成智身。若約圓融。此後更無別佛。

應知此人。卽與三世諸佛同等。卽與三世諸佛如來境界平等。卽與三世諸佛如來功德平等。得如來一身無量身。究竟平等。眞實智慧。

疏第三應知下。與佛平等者。見性均故。發心畢竟

二不別也。文有四句。初總餘別。總言等佛。何所等耶。有三種等。一。所緣境界及分齊境界等。二。大定力無畏等皆等。三。得知身無從。亦無積聚。隨物分別。見種種身。如是智慧與佛平等。鈔三。得知身無從等者。釋經得如來一身無量身。究竟平等。真實智慧。卽用上光明覺品偈釋。偈云。身爲無量。無量復爲一。了知諸世間。現形徧一切。此身無所從。亦無所積聚。衆生分別故。見佛種種身。纔發心時。卽爲十方一切諸佛所共稱歎。卽能說法教化調伏一切世界所有衆生。卽能震動一切世界。

卽能光照一切世界。卽能息滅一切世界諸惡道業。卽能嚴淨一切國土。卽能於一切世界中示現成佛。卽能令一切衆生皆得歡喜。卽能入一切法界性。卽能持一切佛種性。卽能得一切佛智慧光明。

疏第四纔發心時下。能作佛事。有十一句。皆是纔發卽得。言卽得者。有二意故。一。約法圓融。初心攝諸位故。通說諸位相攝。總有三類。一。以行攝位。如信中具一切位。賢首品說。二。以位攝位。如十住滿。卽得成佛。如十住品。及法界品。海幢比丘處說。其三。十行十向十地皆爾。各如自品說。三。初心攝終。如

撰述
華嚴疏鈔卷三
疏
十住初心卽攝諸位。如此品說。並就因位滿說。如普賢作用。大分同佛。猶未是佛。此中亦爾。鈔其十行等者。十行第十智度滿故。入因陀羅網境界。明知已攝諸位。十迴向品第十入法界無量迴向。證窮法界故。十地墮在佛數故。如普賢作用下。例引等妙二覺證成。

疏二約見性齊故。說與佛等。具諸佛法。豎論位次優劣。非無若爾。此與歷別何異。請以喻顯。若彼虛室。置之一燈。光周室內。加二加三。乃至百千。各各重重。徧於室內。雖同周徧。不妨後後益明。初心等

佛。若彼一燈。妙覺等初。同第百千。若器中盛燈。雖復百千。共置一室。互不相見。歷別修行。類同此也。依於此義。故初心卽云振動。光照一切世界。登地已上。却說百刹千刹。如理思之。又卽由此義。廢高就下。住中卽齊地故。鈔二約見性下。此上卽藏和尚意。此下卽天台圓教之意。故云昔人豎說五種菩提。我卽橫開六卽。此中當其分真卽也。請以下三解釋。先喻圓融。後喻行布。又卽由此義等者。亦天台意。智者雖說四教三教。及至果處。却無實事。但就教中施設有果。進入位後。果則便虛。如別

撰述
藝廣疏鈔卷三
九
教說三賢十地。修三賢位。則有可修。及至登地。更無有別別教十地證竟。但是圓家住耳。卽由此義。圓教初住。自在過地。不知此意。故謂此會是說十地。

此初發心菩薩。不於三世少有所得。所謂若諸佛。若諸佛法。若菩薩。若菩薩法。若獨覺。若獨覺法。若聲聞。若聲聞法。若世間。若世間法。若出世間。若出世間法。若衆生。若衆生法。唯求一切智。於諸法界。心無所著。疏第五。此初發下。明大智現前。此文二意。一別是一段。謂以無著大智。求菩提故。二通釋上四段。謂

由於一切無所著。故稱性圓融。能成能攝一切功德。文中分二。初正明無著。後釋其所由。前中初總。所謂下別。謂從三世門。見佛法僧。非佛法僧。同三世攝。於中三位。初八清淨。次四通染淨。後二唯染。後唯求下。釋不著所由。文含多意。一云唯爲菩提。故云求一切智。不餘趣向。故於法界佛等無著。此雖有理。不順今文。以佛及佛法。豈非一切智耶。二云求之於已。不求佛等。求之於已。尚未免求。鈔文含多意者。標也。前二敘昔言求之於已。尚未免求者。破第二釋也。則違淨名於一切法。應無所求。

疏今釋有二。一、只爲求一切智。故求而無著。以有所著。非真求故。故淨名云。夫求法者。於一切法。應無所求。了法無求。順一切智。二言求者。不壞相也。不著者。稱法性也。性相雙鑑。終日求而無所求。經云。無所求中。吾故求之矣。鈔今釋有二下。述正義也。前意卽順般若性空。後意卽明事理雙現。經云。無所求中。吾故求之。卽方等經中。佛爲雷音菩薩。說於法華。昔因緣已。又云。過去有佛名栴檀華。彼佛去世甚久。我於彼時。如汝無異。彼有菩薩。名曰上首。作一乞士。入城乞食。時有比丘。名曰恒伽。

謂乞士言。汝從何來。答曰。我從真實中來。又問。何謂真實。答曰。寂滅相。故名爲真實。又問。寂滅相中。有所求。無所求耶。答曰。無所求。又問。無所求者。何用求耶。答曰。無所求中。吾故求之。又問。無所求中。何用求耶。答曰。有所求者。一切皆空。得者亦空。著者亦空。實者亦空。求者亦空。語者亦空。問者亦空。寂滅涅槃。一切虛空。一切世界。亦復皆空。吾爲如是次第空法。而求真實。又問。菩薩於何處求。答曰。六波羅蜜中求。恒伽聞已。賣身供養。釋曰。然上經文。雙證二意。以正說求者皆空。卽般若意。故不礙。

撰述

華嚴疏鈔卷三

十一

法華

華嚴疏鈔卷十七之

十一

論

求卽雙行意。雙行亦卽不共般若之意耳。

爾時佛神力故。十方各一萬佛刹微塵數世界六種震動。所謂動徧動等徧動。起徧起等徧起。踊徧踊等徧踊。震徧震等徧震。吼徧吼等徧吼。擊徧擊等徧擊。雨衆天華。天香。天末香。天華鬘。天衣。天寶。天莊嚴具。作天妓樂。放天光明。及天音聲。

疏第五爾時下。動地興供分。全同上文。

是時十方各過十佛刹微塵數世界外。有萬佛刹微塵數佛。同名法慧。各現其身。在法慧菩薩前。作如是言。善哉善哉。法慧。汝於今者。能說此法。我等十方各

萬佛刹微塵數佛亦說是法。一切諸佛悉如是說。

疏第六是時十方下。他方證成分。望於上文。有同有異。同義可知。異有三種。卽爲三段。一佛現證成。異前菩薩。二顯益證成。前文所無。三結通無盡。前畧此廣。加說因故。今初也。先現身。次讚說。後引已。同以初心攝德深廣。恐難信受。故佛自證。

汝說此法時。有萬佛刹微塵數菩薩發菩提心。我等今者。悉授其記。於當來世。過千不可說無邊劫。同一劫中。而得作佛。出興於世。皆號清淨心如來。所住世界。各各差別。

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9

疏二汝說此法時下。顯益證成。益通二世。初益現在。後我等悉當護持已下。顯及當來。今初清淨心者。以聞菩提心。見心性故。而經多劫者。然餘教說定三僧祇。此宗所明。劫數不定。畧有四類。一或展則無量不可說不可說。利塵如法界品說。二或千生二生。如善財童子。兜率天子。四初心即得。如前所說。所乘之法。既自在圓融。能乘之人。亦遲速不定。念劫融故。故彌勒云。一切菩薩無量劫修。善財一生皆得起。信則以若遲若速。皆為方便。此宗則

以楷定為權。並有聖言。無煩固執。不以長時。而生退怯。不以速證。而起輕心。若遲若疾。誓要當尅。是佛意也。鈔而經多劫者。此標舉。亦是問難也。應有問言。前來讚經玄妙。則言一生圓曠。劫之果。今既圓妙。何以多劫方成。起信則以下。三雙出二宗之意。發趣道相中。證發心後云。或示超地。速成正覺。以為怯弱眾生。或說於無量阿僧祇劫。當成佛道。以為懈慢眾生。故能示如是無數方便。不可思議。而實菩薩種性根等。發心則等。所證亦等。無有超過之法。以一切菩薩。皆經三阿僧祇劫故。但隨

衆生世界不同所見所聞根欲性異故示所行亦
有差別釋曰此卽以遲速皆方便也此宗則楷定
爲權以不定或遲或速爲實如前第二段明故毘
目瞿沙躡時執手時經多劫則一生不定一生無
量劫卽一念多劫豈爲多劫故結勸之勿生執也
我等悉當護持此法令未來世一切菩薩未曾聞者
皆悉得聞

疏後益末世令信仰故今之聞者皆由佛力願深
愧信行

如此娑婆世界四天下須彌頂上說如是法令諸衆
生聞已受化如是十方百千億那由他無數無量無
邊無等不可數不可稱不可思不可量不可說盡法
界虛空界諸世界中亦說此法教化衆生

疏三如下結通無盡是證佛結通非經家也先
明說徧

其說法者同名法慧悉以佛神力故世尊本願力故
爲欲顯示佛法故爲以智光普照故爲欲開闡實義
故爲令證得法性故爲令衆會悉歡喜故爲欲開示
佛法因故爲得一切佛平等故爲了法界無有二故
說如是法

疏後其說法下。示所說同。文中有三。一說人同。二說因同。謂神力本願故。三說意同。爲欲下。是此文大旨。同前十住。並顯可知。鈔此文大旨等者。同十住中加所爲也。此中顯示一切佛法。卽前持說佛法故。二智光普照。卽前覺一切佛法。三開闡實義。卽前增長佛智。四證得法性。卽前所入無礙。五衆會歡喜。卽前善了衆生界。及知衆生根。六開示佛法因。卽前所行無障。及得無等方便。七爲得一切佛平等。卽前入一切智性。八爲了法界無有二。故卽前深入法界。故總結云。說如是法。明是說因。

爾時法慧菩薩。普觀盡虛空界十方國土一切衆會。欲悉成就諸衆生故。欲悉淨治諸業果報故。欲悉開顯清淨法界故。欲悉拔除雜染根本故。欲悉增長廣大信解故。欲悉令知無量衆生根故。欲悉令知三世法平等故。欲悉令觀察涅槃繫界故。欲增長自清淨善根故。承佛威力。卽說頌言。

疏第七爾時下。以偈重頌分。先辨偈意。有十一句。初一後一。是說偈儀。而離開者。欲顯中九。皆承佛力。該十方故。中九。正明所爲。初總餘別。別中四對。一淨業顯理。二除惑開信。妄想分別爲雜染根。二

撰述

華嚴疏鈔卷三

五

知病識藥。四觀果淨因。卽由利他。自業便淨。鈔
一淨業顯理者。業淨則理顯故。二除惑開信者。若
無妄想。卽增信解故。餘可知。

爲利世間發大心。其心普徧於十方衆生國土三世
法。佛及菩薩最勝海。

疏第二正顯偈辭。有一百二十一頌。文分三段。初
八十二偈。超頌。就法畧示。二有三十四偈。却頌。就
喻校量。三有五偈。結德勸讚。今景慕發心。歎深難
說。徧於三段。又歎爲長行偈頌之本。故畧不頌之。
初中文亦分五初。有十七偈。頌第一解行圓滿。二

菩薩始發下十七頌。超頌第四能作佛事。三菩薩
所住下十八偈。却頌第三得佛平等。四趣向菩提
下六偈半。頌第五大智現前。五恒勸衆生下二十
三偈半。頌第二當成妙果。文不次者。顯德無前後
故。又長行明先同果體。後同果用。偈明用可在今
果明當得。大智通徧故。前後互明。初中文分爲二。
初一偈頌前。正明解行圓滿。然初句是總舉發
心爲因。

究竟虛空等法界。所有一切諸世間。如諸佛法皆往
詣。如是發心無退轉。

疏餘十六偈。頌前徵釋。於中有七。初一偈。頌充徧一切世界。

慈念衆生無暫捨。離諸惱害普饒益。光明照世爲所歸。十力護念難思議。

十方國土悉趣入。一切色形皆示現。如佛福智廣無邊。隨順修因無所著。

疏二有二偈。頌爲欲度脫一切世界衆生。

有利仰任或傍覆。籠妙廣大無量種。菩薩一發最上心。悉能往詣皆無礙。

疏二有一偈。頌知世界成壞。知者。意在往化觀佛

故。

菩薩勝行不可說。皆勤修習無所任。見一切佛常欣樂。普入於其深法海。哀愍五趣諸羣生。令除垢穢普清淨。

疏四一偈半。頌爲悉知一切衆生垢淨故。及一切世界三有清淨。知垢意在令淨故。五趣三有。各左右耳。

紹隆佛種不斷絕。摧滅魔宮無有餘。

已住如來平等性。善修微妙方便道。於佛境界起信心。得佛灌頂心無著。

兩足尊所念報恩。心如金剛不可沮。於佛所行能照了。自然修習菩提行。

疏五紹隆下。兩偈半。却頌爲不斷如來種性故。初半摧邪顯正。卽紹隆義。次句示佛種之體性。次二句卽起佛種緣。餘是種起之相。化化不絕。是報佛恩。心如金剛。是種性義。照佛所行。修菩提行。則佛種不斷也。

諸趣差別想無量。業果及心亦非一。乃至根性種種殊。一發大心悉明見。其心廣大等法界。無依無變如虛空。趣向佛智無所

取諦了實際離分別。

知衆生心無生想了達諸法無法想。雖普分別無分別。億那由利皆在諸。無量諸佛妙法藏。隨順觀察悉能入。衆生根行靡不知。到如是處如世尊。清淨大願恒相應。樂供如來不退轉。人天見者無厭足。常爲諸佛所護念。

疏六五偈頌知衆生心樂煩惱習氣下四種發心。於中初偈總明所知事。想是妄想。卽煩惱也。業卽習氣。果卽處此生彼心。卽心行。根性卽諸根。次二

偈顯知之體相。皆卽事入玄。次偈非唯知病。亦識法藥。故如世尊。後偈非唯空知。行願相符。能爲實益。

其心清淨無所依。雖觀深法而不取。如是思惟無量劫。於三世中無所著。

其心堅固難沮。趣佛菩提無障礙。志求妙道除蒙惑。周行法界不告勞。

知語言法皆寂滅。但入真如絕異解。諸佛境界悉順觀。達於三世心無礙。

疏七有三偈。頌知一切衆生三世智。謂離二世障。

故障有十種。一煩惱雜染障。二觸境迷倒障。三長

時懈怠障。四取著因果障。五邪教邪師引轉障。六

趣下乘障。七籠相現前障。八於徧趣行無堪能障。

九隨言生解障。十不亡能所障。如次十句。各一對

治。末後二句。總結通達。

菩薩始發廣大心。卽能徧往十方刹。法門無量不可說。智光普照皆明了。

大悲廣度最無比。慈心普徧等虛空。而於衆生分別。如是清淨遊於世。

疏第二菩薩始發下。有十七偈。頌上能作佛事。總

分爲十。初二偈頌卽能說法教化調伏一切衆生。以悲智相導故。

十方衆生悉慰安。一切所作皆真實。恒以淨心不異語。常爲諸佛共加護。

疏二有一偈。頌諸佛讚歎。歎必加護。

過去所有皆憶念。未來一切悉分別。十方世界普入中。爲度衆生令出離。

疏三有一偈。頌卽能振動一切世界。動入互舉。

菩薩具足妙智光善了。因緣無有疑。一切迷惑皆除斷。如是而遊於法界。

魔王宮殿悉摧破。衆生翳膜咸除滅。離諸分別心不動。善了如來之境界。

三世疑網悉已除。於如來所起淨信。以信得成不動智。智清淨故解真實。

爲令衆生得出離。盡於後際普饒益。長時勤苦心無厭。乃至地獄亦安受。

福智無量皆具足。衆生根欲悉了知。及諸業行無不見。如其所樂爲說法。

了知一切空無我。慈念衆生恒不捨。以一大悲微妙音。普入世間而演說。

疏四菩薩具足下六偈。頌卽能息滅一切諸惡道
苦。於中具悲智之德。故能拔因果之罟。而無我入
放大光明種種色。普照衆生除黑暗。光中菩薩坐蓮
華。爲衆闡揚清淨法。

疏五有一偈。頌卽能光照一切世界。照世意在照
生。

於一毛端現衆刹。諸大菩薩皆充滿。衆會智慧各不
同。悉能明了衆生心。

疏六一偈。卽能嚴淨一切國土。毛孔現刹。卽神通
嚴也。

十方世界不可說。一念周行無不盡。利益衆生供養
佛。於諸佛所問深義。於諸如來作父想。爲利衆生修
覺行。

疏七有一偈半。頌上卽令一切衆生歡喜。供佛間
法。但爲益物故。

智慧善巧通法藏。入深智處無所著。隨順思惟說法
界。經無量劫不可盡。智雖善入無處所。無有疲厭無
所著。

疏八一偈半。頌上卽能入一切法界性。初半聞而
通達。次半思而兼說。後半修而無著。

三世諸佛家中生證得如來妙法身。

疏九有半偈依修而證。頌卽能持一切佛種性也。普爲羣生現衆色。譬如幻師無不作。或現始修殊勝行。或現初生及出家。或現樹下成菩提。或爲衆生示涅槃。

疏十有一偈半。頌卽能示現成佛。

菩薩所住希有法。唯佛境界非二乘。身語意想皆已除。種種隨宜悉能現。

菩薩所得諸佛法。衆生思惟發狂亂。智入實際心無礙。普現如來自在力。

此於世間無與等。何況復增殊勝行。雖夫具足一切智。已獲如來自在力。已住究竟一乘道。深入微妙最上法。

疏第三菩薩所住下十八偈。頌得佛平等。於中分四。初三偈半。頌佛境界平等。初偈分齊境。次偈兼所證所緣境。後一偈半。舉況顯勝。

善知衆生時非時。爲利益故現神通。分身徧滿一切刹。放淨光明除世暗。譬如龍王起大雲。普雨妙雨悉充給。觀察衆生如幻夢。以業力故常流轉。

大悲哀愍咸救拔爲說無爲淨法性佛力無量此亦然譬如虛空無有邊。
爲令衆生得解脫億劫勤修而不倦種種思惟妙功德善修無上第一業於諸勝行恒不捨專念生成一切智。

疏二善知下四偈半頌功德平等。
一身示現無量身一切世界悉周徧其心清淨無分別一念難思力如是。

疏三有一偈頌前文得如來一身無量身平等。
於諸世間不分別於一切法無妄想雖觀諸法而不

取恒救衆生無所度。

一切世間唯是想於中種種各差別知想境界險且深爲現神通而救脫。

譬如幻師自在力菩薩神變亦如是身徧法界及虛空隨衆生心靡不見。

能所分別二俱離雜染清淨無所取若縛若解智悉忘但願普與衆生樂。

疏四於諸下九偈頌真實智慧於中有四初四頌發離一切妄想廣大心。

一切世間唯想力以智而入心無畏思惟諸法亦復

然三世推求不可得。能入過去畢前際。能入未來畢後際。能入現在一切處。常勤觀察無所有。

疏二有二頌。發窮三際廣大心。

隨順涅槃寂滅法。住於無諍無所依。心如實際無與等。專向菩提永不退。修諸勝行無退怯。安住菩提不動搖。佛及菩薩與世間。盡於法界皆明了。

疏三有二頌。發順涅槃菩提廣大心。

欲得最勝第一道。爲一切智解脫王。應當速發菩提

心。永盡諸漏利羣生。

疏四一偈。結勸可知。

趣向菩提心清淨。功德廣大不可說。爲利衆生故稱述。汝等諸賢應善聽。

疏第四趣向菩提下六偈半。頌大智現前。於中初

一結前生後。

無量世界盡爲塵。一一塵中無量刹。其中諸佛皆無量。悉能明見無所取。善知衆生無生想。善知言語無語想。於諸世界心無礙。悉善了知無所著。

其心廣大如虛空。於三世事悉明達。一切疑惑皆除滅。正觀佛法無所取。十方無量諸國土。一念往詣心無著。了達世間衆苦法。悉任無生真實際。無量難思諸佛所。悉往彼會而覲謁。常爲上首問如來菩薩所修諸願行。心常憶念十方佛。而無所依無所取。

疏餘正頌大智現前。初偈於佛無著。次偈卽若衆生。若衆生法。次偈卽若佛若佛法。次偈若世間若世間法。次偈若菩薩若菩薩法。二乘文畧後半偈。

頌上結文。念十方佛。卽求一切智。無依無取。卽於諸法界心無所著。

恒勸衆生種善根。莊嚴國土令清淨。一切趣生三有處。以無礙眼咸觀察。

所有習性諸根解。無量無邊悉明見。衆生心樂悉了知。如是隨宜爲說法。

於諸染淨皆通達。令彼修治入於道。無量無數諸二昧菩薩。一念皆能入。

於中想智及所緣。悉善了知得自在。

疏第五有二十三偈半。頌前妙果當成於中有九。

初三偈半。頌常爲一切諸佛護念以具德故。

菩薩獲此廣大智。疾向菩提無所礙。

疏二半偈。頌當得無上菩提。

爲欲利益諸羣生。處處宣揚大人法。

疏三半偈。頌與其妙法。大人法者。八大人覺也。

鈔八大人覺者。遺教全明。一少欲。二知足。三寂靜。

四精進。五正念。六正定。七正慧。八無戲論。涅槃二。

十七加二爲十。云善男子。菩薩成就十法。雖見佛。

法。不得明了。前七同上。八卽解脫。九讚歎解脫。十。

以涅槃教化衆生。十地抄中。更當廣釋。

善知世間長短劫。一月半月及晝夜。國土各別性平。

等。常勤觀察不放逸。

疏四有一偈。頌佛體平等。時處平等。卽佛體故。

普詣十方諸世界。而於方處無所取。嚴淨國土悉無。

餘。亦不曾生淨分別。

疏五有一偈。頌已修三世諸佛助道之法。

衆生是處若非處。及以諸業感報別。隨順思惟入佛。

力。於此一切悉了知。

一切世間種種性。種種所行住。三有利根及與中下。

根。如是一切咸觀察。

淨與不淨種種解勝劣及中悉明見一切衆生至處行三有相續皆能說。禪定解脫諸三昧染淨因起各不同及以先世苦樂殊淨修佛力咸能見衆生業惑續諸趣斷此諸趣得寂滅種種漏法永生并其習種悉了知。

如來煩惱皆除盡大智光明照於世菩薩於佛十力中雖未證得亦無疑。

疏六有六偈頌成就三世諸佛力無所畏廣十力之別名畧無畏之都號於中五偈半別明十力後

半偈顯德分齊

菩薩於一毛孔中普現十方無量刹或有雜染或清淨種種業作皆能了。

一微塵中無量刹無量諸佛及佛子諸刹各別無雜亂如一切一切悉明見。

於一毛孔見十方盡虛空界諸世間無有一處空無佛如是佛刹悉清淨。

於毛孔中見佛刹復見一切諸衆生三世六趣各不同晝夜月時有縛解。

如是大智諸菩薩專心趣向法王位於佛所住順思

惟而獲無邊大歡喜。

疏七有五偈。頌已莊嚴三世諸佛不共佛法。三世間圓融不共權小故。

菩薩分身無量億。供養一切諸如來。神通變現勝無比。佛所行處皆能任。

無量佛所皆鑽仰。所有法藏悉耽味。見佛聞法勤修行。如飲甘露心歡喜。

已獲如來勝三昧。善入諸法智增長。信心不動如須彌。善作羣生功德藏。

慈生廣大徧衆生。悉願疾成一切智。而恒無著無依

處。離諸煩惱得自在。

哀愍衆生廣大智。普攝一切同於已。知空無相無真實。而行其心不懈退。

疏八五偈。頌悉得諸佛說法智慧。

菩薩發心功德量。億劫稱揚不可盡。以出一切諸如來。獨覺聲聞安樂故。

疏九一偈。結德無盡。并屬初心。該前諸段。

十方國土諸衆生。皆悉施安無量劫。勸持五戒及十善。四禪四等諸定處。

復於多劫施安樂。令斷諸惑成羅漢。彼諸福聚雖無

量不與發心功德比。又教億眾成緣覺。獲無諍行微妙道。以彼而拔菩提心。算數譬喻無能及。

一念能過塵數刹。如是經於無量劫。此諸刹數尚可量。發心功德不可知。

過去未來及現在。所有劫數無邊量。此諸劫數猶可知。發心功德無能測。

以菩提心徧十方。所有分別塵不知。一念三世悉明達。利益無量眾生故。

十方世界諸眾生。欲解方便意所行。及以虛空際可測。發心功德難知量。

菩薩志願等十方。慈心普洽諸羣生。悉使修成佛功德。是故其力無邊際。

眾生欲解心所樂。諸根方便行各別。於一念中悉了知。一切智智心同等。

一切眾生諸惑業。三有相續無暫斷。此諸邊際尚可知。發心功德難思議。

發心能離業煩惱。供養一切諸如來。業惑既離相續斷。普於三世得解脫。

一念供養無邊佛。亦供無數諸眾生。悉以香華及妙

鬘寶幢旛蓋上衣服。無量寶聚悉悉。又香華又。美食珍座經行處。種種宮殿悉嚴好。毘盧遮那妙寶珠。如意摩尼發光耀。念念如是持供養。經無量劫不可說。其人福聚雖復多。不及發心功德大。

疏大文第二十方國土下。三十四頌。頌前約喻。量於中分二。先十四頌。正頌前喻可知。

所說種種衆譬喻。無有能及菩提心。

疏後二十偈。通釋諸喻不及所由。前雖畧釋。今此廣辨。又長行中多隨喻別明。今此總辨。亦總相頌。

前歎深難說。若將別配。則令難證等。互有所局。於中分三。初半偈。結前生後。鈔亦總相頌前者。昔以二十三偈。頌前歎深難說。卽分爲十。初三頌甚深。二有一偈頌難知。三有二偈頌難分別。四有二偈頌難信解。五三偈頌難證。六二偈頌難行。七二偈頌難通達。八有一偈頌難思惟。九二偈頌難說。十有三偈頌難度量。故云若將別配。言則令難證等者。如一切獨覺及聲聞。悉以發心作根本。頌難證者。前文十力十八不共等。豈易證耶。故云互有所局。今二十三偈。皆通難信難知難證等。故云

總相頌前。則令證等。互無所局。

以諸三世人中尊。皆從發心而得生。發心無礙無齊限。欲求其量不可得。

疏次十七偈半。正釋。後二偈結德無盡。就正釋中分三。初偈標章。次十二偈半別釋。三四偈顯德圓滿。今初也。謂標出生無盡體相無限二章。

一切智智誓必成。所有衆生皆永度。發心廣大等虛空。生諸功德同法界。

所行普徧如無異。永離衆著佛平等。一切法門無不入。一切國土悉能往。

一切智境咸通達。一切功德皆成就。一切能捨恒相續。淨諸戒品無所著。

具足無上大福德。常勤精進不退轉。入深禪定恒思惟。廣大智慧共相應。

疏二別釋中。初四偈釋無齊限。或一句是一義。後一偈半六度義。可以意得。

此是菩薩最勝地。出生一切普賢道。三世一切諸如來。靡不護念初發心。

悉以三昧陀羅尼。神通變化共莊嚴。十方衆生無有量。世界虛空亦如是。發心無量過於彼。是故能生一

切佛。

疏後八偈半。釋出生無盡於中分三。初二偈半。結前生後。以體無限。故出生無盡也。

菩提心是十力本。亦為四辨無畏本。十八不共亦復然。莫不皆從發心得。

諸佛色相莊嚴身。及以平等妙法身。智慧無著所應供。悉以發心而得有。

一切獨覺聲聞乘。色界諸禪三昧樂。及無色界諸三昧。悉以發心作其本。

一切人天自在樂。及以諸趣種種樂。進定根力等衆

樂。靡不皆由初發心。

疏次菩提心是下四偈。正顯出生為本。出生乃一義耳。

以因發起廣大心。則能修行六種度。勸諸衆生行正行。於三界中受安樂。

任佛無礙實義智。所有妙業。咸開闡。能令無量諸衆生。悉斷惑業。向涅槃。

疏後二偈。畧釋為本所由。由修六度為菩薩乘本。由勸正行為人天乘本。由闡妙業。通為三乘涅槃之本。

智慧光明如淨日。衆行具足猶滿月。功德常盈譬巨海。無垢無礙同虛空。

昔發無邊功德願。悉與一切衆生樂。盡未來際依願行。常勤修習度衆生。

無量大願難思議。願令衆生悉清淨。空無相願無依處。以願力故皆明顯。

了法自性如虛空。一切寂滅悉平等。法門無數不可說。爲衆生說無所著。

疏三四偈顯德圓滿中。初偈總顯。次二偈別顯。願滿後一偈別明智圓。

十方世界諸如來。悉共讚歎初發心。此心無量德所嚴。能到彼岸同於佛。

如衆生數爾許劫。說其功德不可盡。以住如來廣大家。三界諸法無能喻。

疏第三二偈。結德無盡可知。欲知一切諸佛法。宜應速發菩提心。

疏大文第三欲知下。結勸發心。於中三。初半偈正勸。

此心功德中最勝。必得如來無礙智。衆生心行可數知。國土微塵亦復然。虛空邊際乍可量。發心功德無

撰述

大方廣華嚴經疏鈔卷十七之三

能測。

出生三世一切佛。成就世間一切樂。增長一切勝功德。永斷一切諸疑惑。

開示一切妙境界。盡除一切諸障礙。成就一切清淨利。出生一切如來智。

疏次三偈半。釋勸所由。總舉具足一切德故。

欲見十方一切佛。欲施無量功德藏。欲滅衆生諸苦惱。宜應速發菩提心。

疏後一偈。結勸速發。

仁和信士張鴻舉捨資五兩一錢七分五厘

刻此一卷伏願

先光祿景星公速證菩提

家孺人周氏暨舉家眷屬時增如意之福

大方廣佛華嚴經疏鈔卷十七之三

終

撰述

華嚴疏鈔卷三

大方廣佛華嚴經疏鈔卷三十九

開

此處有極大的墨跡，可能是書寫時被塗黑或嚴重損壞，導致文字完全不可辨識。

大方廣佛華嚴經疏鈔卷第十八

于闐國三藏沙門實叉難陀 譯

清涼山大華嚴寺沙門澄觀撰述

明法品第十八

疏初來意者。前明當位所成之德。今辨趣後勝進之行。故次來也。又前明發心之勝德。今辨所具之行相。故次來也。

疏二釋名者。準梵具翻。應云法光明品。統有四義。

一法慧智慧。於能所詮。進趣行法。分明照了。故即明所知法。二明是能詮。以能顯行故。法是所詮。可

法苑珠林

華嚴疏鈔卷十八

一

軌則故。此則詮旨合目。明有法故。法之明故。通二
釋也。三明是智用法。是理行及果。境智合說。俱是
所詮。法之明明之法。依主名也。四所修行法。體離
無明。亦唯所詮。有明之法。法卽是明。通有財持業
也。鈔統有四義者。然法光明。攝論中釋云。能正
了知。周徧無量。無分限相。大法光明。今疏取諸釋
意。叅爲四義。初一卽世親意。世親先牒本論。意釋
云。謂正了達十方無邊無分限相。如善習誦文字
光明。名法光明。今疏取意。以能正了達卽法智慧。
十方無邊法。卽此勝進能所詮法也。二卽無性意。

彼牒本論。竟釋云。謂正通達十方無邊無分限相。
顯照行故。各法光明。今疏取意。無性但有顯照行
言。異於世親。故取意義。以能詮爲光明。而無性意
亦有菩薩智爲明耳。上二攝論皆是第七。三卽梁
論意。梁論卽世親同本異譯。而文稍廣。多是敵對
譯故。彼論第十先牒本論云。三能見一切處無量
分別相善法光明。次釋云。約三乘法說一切處。又
約內外法說一切處。又約真俗法說一切處。如此
一切處。菩薩能見無量相。如佛所說法相。及世間
所立法相。菩薩皆能了達。卽如量智。如其本數量。

菩薩以如理智通達無分別相。此二智能照了真俗境故。名法光明。釋曰。此中論意。不異初釋。但文廣說一切處等耳。而能了者。亦通諸菩薩智。今取其別意。但取所詮中菩薩之智。異法慧智。故爲別耳。其第四意。一向義加。顯此四解。後後狹於前前。疏三宗趣者。明法不同。畧有四種。謂教理行果。尋教悟理。觀理起行。行成得果。皆初宗後趣。又此四皆宗。爲成後位及成勝德爲趣。爾時精進慧菩薩白法慧菩薩言。

疏第四釋文。文有三分。一請說分。二正說分。三結

說分。今初分二。先長行。後祇夜前中。亦二。初敘問答之人。勝進趣後。非勤不能。故精進慧問。

佛子。菩薩摩訶薩。初發求一切智心。成就如是無量功德。具大莊嚴。升一切智乘。入菩薩正位。捨諸世間法。得佛出世法。去來現在。諸佛攝受。決定至於無上菩提究竟之處。

疏二佛子下。正申所問。亦分爲二。初領前自分勝德。後請說勝進之符。前中先總。後具大莊嚴下別。別有七句。一領德。卽領前莊嚴一切諸佛不共之法。二領乘。卽上已任究竟一乘道。三領位。位不退。

撰述
聖嚴疏鈔卷十八
三
故卽上已住如來平等性。三世諸佛家中生。此下
晉云離生道者。卽是領道。圓教初住。離生因故。今
四五二句。晉經一句。以捨世間。得出世法。入住正
位。卽上於諸世間。不分別等。六去來現在諸佛。攝
受。領得勝緣。卽上佛護佛讚等也。七決定至於菩
提。領其當果。卽上云當得三世諸佛無上菩提。德
雖無量。不出於此。故畧舉耳。此約當住位釋。若約
攝於上位。理無不通。而於求勝進義。非愜當。鈔
德雖無量。下總結。謂頌其當位。已得勝進。云何上
求。故云。而於勝進義。非愜當。

彼諸菩薩於佛教中。云何修習。令諸如來皆生歡喜。
入諸菩薩所住之處。一切大行。皆得清淨。所有大願。
悉使滿足。獲諸菩薩廣大之藏。隨所應化。常爲說法。
而恒不捨波羅蜜行。所念衆生。咸令得度。紹三寶種。
使不斷絕。善根方便。皆悉不虛。

疏二彼諸菩薩下。請後勝進中。亦二。先問所成行
體。後問行成德用。以破痴等爲德用故。前中先正
問。後結請。前中十句爲三。初五自利兼他。一問云。
何修習。順佛令喜。其修習言。亦總亦別。總徧諸句。
別謂策勤。卽下答中。明不放棄。二問順法入位。三

撰述
對崩頭金卷一
四
順行四順願。五順德積德成藏。故次四利他兼自。
束爲二對。初常說法而不捨自行。後下念四生。上
弘三寶。末後一句總結。二利不虛。

佛子。彼諸菩薩。以何方便能令此法當得圓滿。願垂
哀愍。爲我宣說。此諸大會靡不樂聞。

疏二佛子下。結請可知。

復次如諸菩薩摩訶薩。常勤修習。滅除一切無明黑
暗。降伏魔怨。制諸外道。永滌一切煩惱心垢。悉能成
就一切善根。永出一切惡趣諸難。淨治一切大智境
界。成就一切菩薩諸地。諸波羅蜜。總持三昧。六通三

明四無所畏。清淨功德莊嚴。一切諸佛國土及諸相
好身語心行成就。滿足善知一切諸佛如來力無所
畏。不共佛法。一切智智所行境界。爲欲成熟一切衆
生。隨其心樂。而取佛土。隨根隨時。如應說法。種種無
量廣大佛事。

疏第二復次下。問行成德用。文亦分二。初正問。後
結請。前中分二。初問行所成。因德。二問結因。成果
德。今初有十二事。初十一字貫下諸句。一能滅無
明。未審修何行法。而能滅耶。諸句皆爾。意在徵因。
無明有體。黑暗無用。非明無之處。卽名無明。故別

撰述
垂肩疏金卷十八
五
有惑體。由無明故事理皆昧。名爲黑暗。二問降魔。三問制外。四問究竟斷道。心垢卽是所知。亦名習氣。五善根以何而成。六三惡八難云何可出。七智境何由淨治。八地等七種淨德云何成就。九依正三業功德云何莊嚴滿足。十以何觀力知佛功德。十一一切智境復云何知。十二何法能成就衆生。乃至作大佛事。鈔非明無之處等者。卽俱舍第十偈云。明所治無明。如非親實等。上句正明有體。謂此無明不了四諦所對治。名曰無明。與明相違。方名無明。非是離明之外。皆是無明。此揀眼等亦

非明無之處卽名無明。此則正名有體。下句舉喻釋成。六地當辨。

及餘無量諸功德法。諸行諸道及諸境界皆悉圓滿。疾與如來功德平等。

疏第二及餘下。結因成果德於中。二。先正結平等。謂結所不說。及等如來。

於諸如來應正等覺。百千阿僧祇劫修菩薩行時。所集法藏。悉能守護。開示演說。諸魔外道無能沮壞。攝持正法。無有窮盡。於一切世界演說法時。天王龍王。夜叉王。乾闥婆王。阿修羅王。迦樓羅王。緊那羅王。摩

巽述
華嚴疏鈔卷十八
一
睽羅伽王人王梵王如來法王皆悉守護一切世間
恭敬供養同灌其頂常爲諸佛之所護念一切菩薩
亦皆愛敬得善根力增長白法開演如來甚深法藏
攝持正法以自莊嚴。

疏第二於諸如來下顯等佛之用護持正法便等
佛故故偏明之文有十句初總餘別總謂開示演
說教理行果皆有護義諸魔下別一異敵不侵二
攝持修行三十王外助四舉世同欽五諸佛灌頂
準梵本云一切如來共所守護同灌其頂故應迴
文六菩薩愛敬七得衆善根八能演深法九攝德
自嚴若得此九方名護法。

一切菩薩所行次第願皆演說。

疏二一切下結請可知。

爾時精進慧菩薩欲重宣其義而說頌言

大名稱者善能演菩薩所成功德法深入無邊廣大
行具足清淨無師智。

疏第二爾時下偈文分二初一讚說者。

若有菩薩初發心成就福德智慧乘入離生位超世
間普獲正等菩提法。

疏餘十頌上文於中亦二初一頌領前。

撰述
華嚴疏鈔卷十八
彼復云何佛教中堅固勤修轉增勝。令諸如來悉歡喜佛所任地速當入。

所行清淨願皆滿。及得廣大智慧藏。常能說法度衆生。而心無依無所著。

菩薩一切波羅蜜。悉善修行無缺減。所念衆生咸救度。常持佛種使不絕。

所作堅固不唐捐。一切功成得出離。如諸勝者所修行。彼清淨道願宣說。

疏餘頌請後於中亦二。前四頌所修行體。

永破一切無明暗。降伏衆魔及外道。所有垢穢悉滌

除。得近如來大智慧。

永離惡趣諸險難。淨治大智殊勝境。獲妙道力鄰上尊。一切功德皆成就。

證德如來最勝智。任於無量諸國土。隨衆生心而說法。及作廣大諸佛事。

疏後五頌行所成德。於中亦二。前三頌行所成因德。

云何而得諸妙道。開演如來正法藏。常能受持諸佛法。無能超勝無與等。

云何無畏如師子。所行清淨如滿月。云何修習佛功

德猶如蓮華不著水。

疏後二頌結因成果德。

爾時法慧菩薩告精進慧菩薩言善哉佛子。汝今爲欲多所饒益。多所安樂。多所惠利。哀愍世間諸天及人。問於如是菩薩所修清淨之行。

疏大文第二正說分中分二。先長行。後偈頌。前中亦二。先讚問許說。後正答所問。前中三。初讚所問利益也。

佛子。汝任實法。發大精進。增長不退。已得解脫。能作是問。同於如來。

疏二佛子下。讚能問具德。

諦聽諦聽。善思念之。我今承佛威神之力。爲汝於中說其少分。

疏三諦聽下。戒聽許說。

佛子。菩薩摩訶薩。已發一切智心。應離癡暗。精勤守護。無令放逸。

疏第二正答中二。先答所成行體。後答行成德用。前中答前十問卽爲十段。今初段中有五十句。前二十句答前修習。後三十句答令佛歡喜。前修習言亦總亦別。今不放逸。亦通總別。總則徧下十段。

皆由不放逸成別則屬於修習在文分二先牒前
標後勤智守心不犯塵境名不放逸是修習相不
守根門是名放逸。鈔不守根門名爲放逸卽瑜
伽意前文曾引此段疏支乃有三義初畧釋名二
涅槃云下先彰所以三出其體業。

疏涅槃云不放逸根深固難拔因不放逸一切善
根皆得增長故首明之。鈔二中卽涅槃二十四
高貴德王菩薩品十功德中第四十事利益功德
於中一根深難拔經自牒云云何根深難拔所言
根者名不放逸不放逸者爲是何根所謂阿耨多

羅三藐三菩提根不放逸故諸餘善根展轉增長
以能增長諸善根故最爲殊勝善男子如諸跡中
象跡爲上如日之光諸光中勝亦如輪王諸王中
勝諸河之中四河最勝諸山之中須彌山勝善男
子如水生華青蓮華爲最不放逸法亦復如是於
諸善中爲最爲上善男子如陸生華婆利師華爲
最爲上不放逸法亦復如是師子金翅羅睺大身
乃至佛僧爲衆中最廣引喻竟結云如是義故不
放逸根深故難拔卽其文也。

疏卽精進三根於所斷修防非爲性對治放逸成

滿一切世出世間善事爲業。鈔卽精進三根下。第三出其體業。卽唯識第六釋曰。謂依精進及無貪等三種善根。此之四法於所斷惡。防令不起於所修善。隨令增長。體是四法。約別功能而假建立名。不放逸。非別有體。

佛子。菩薩摩訶薩。任十種法。名不放逸。何者。爲十。一者護持衆戒。二者遠離愚癡淨菩提心。三者心樂質直離諸諂誑。四者勤修善根。無有退轉。五者恒善思惟。自所發心。六者不樂親近在家出家一切凡夫七者修諸善業。而不願求出世間果報。八者永離二乘。行菩薩道。九者樂修衆善。令不斷絕。十者恒善觀察。自相續力。佛子。若諸菩薩行此十法。是則名爲任不放逸。

疏二辨別中有二十句。前十始修。後十終成。今初有四。一總標。二徵數。三別列。四總結。他皆倣此。列中一對治破戒放逸。三聚非一。故名爲衆。卽三德三身之因。故首明也。寧捨身命。不犯小罪。故名護持。二離癡智顯。故菩提心淨。三四可知。五恐負自心。故思本發。六遠離惡緣。七修善無住。八離小行。大寧起。亦癡野干之心。不起二乘之心。難反復故。

無述
華嚴疏鈔卷十
九積善無替。十亦愛亦策。不令過分。使不相續。若不續者。當令相續。故須觀察。鈔寧起疥癩下。卽薩遮尼毘子經。難反復故。卽淨名文。彼第二經云。凡夫於佛法有反復而聲聞無也。

佛子。菩薩摩訶薩。任不放逸。得十種清淨。何者。爲十。一者如說而行。二者念智成就。三者任於深定。不沉不舉。四者樂求佛法。無有懈怠。五者隨所聞法。如理觀察。具足出生。巧妙智慧。六者入深禪定。得佛神通。七者其心平等。無有高下。八者於諸衆生。上中下類。心無障礙。猶如大地。等作利益。九者若見衆生。乃至一發菩提之心。尊重承事。猶如和尚。十者於授戒和尚。及阿闍梨。一切菩薩。諸善知識。法師之所常生。尊重承事。供養佛子。是名菩薩。任不放逸。十種清淨。

疏二終成十中。一行清淨。由不放逸。得無違教失。故各清淨。二念智清淨。念則明記。智則決斷。念有智故。念卽無念。智有念故。常得現前。此二相資。故名成就。三等持清淨。不沉不掉。故名爲等。然此沉掉。乃含多意。如始學者。不昏沉。不惡作。亦名爲等。未是深定。今稱性寂然。故能不掉。智照不昧。所以不沉。如此深定。非深非淺。四勤聞清淨。五思修清

標述
華嚴疏鈔卷十八
淨。六等引清淨。七妙慧清淨。稱理平等故。八攝受清淨。等利益故。如大地者。勝鬘云。譬如大地。負四重擔。一者大海。二者諸山。三者草木。四者衆生。菩薩大地荷負。四種重任者。謂離善知識。無聞非法。衆生以人天善根而成熟之。及三乘人。隨機徧攝。名等作利益。九同行清淨。謂如彌伽讚敬善財。十承事清淨。輕離心故。鈔謂離善知識下。合上四種重任。此合大海最深。重難持故。諸山喻菩薩十地。十地如十山。故草木喻緣覺獨善。不從師故。衆生喻聲聞。有師屬故。

佛子。菩薩摩訶薩。任不放逸。發大精進。起於正念。生勝欲樂。所行不息。於一切法。心無依處。於甚深法。能勤修習。入無諍門。增廣大心。佛法無邊。能順了知。令諸如來。皆悉歡喜。

疏次答令佛喜有三十句。初十結前生後。次十正成行相。後十純熟究竟。今初。此卽牒前十種清淨。如次配屬。前八可知。九攝二句。以菩提心佛法無邊。誓願知故。既敬此心。及事於師。故能順了。上九結前。第十生後。故令佛喜。

佛子。菩薩摩訶薩。復有十法。能令一切諸佛歡喜。何

撰述
華嚴疏鈔卷第十
等爲十。一者精進不退。二者不惜身命。三者於諸利養無所希求。四者知一切法皆如虛空。五者善能觀察。普入法界。六者知諸法印。心無倚著。七者常發大願。八者成就清淨忍智光明。九者觀自善法。心無增減。十者依無作門。修諸淨行。佛子是。爲菩薩任十種法。能令一切如來歡喜。

疏次十正成行相者。前明卽前修習。故令佛喜。今更別明。於中一勤而不退。成上精進。二內不惜身。正念方成。三外絕異。求故唯有勝進。四加行觀空。方能不息。五正證入理。故無所依。

疏六窮得法印。方順深法。法印多種。或五或四。或三或一。但廣畧之異耳。言五印者。卽五非常觀。謂無常。罽空。無我。寂靜。言四印者。合空入於無我。空卽我所故。或名優陀那。菩薩藏經第二中。名法。鄔陀南。鄔陀南者。此名標相。涅槃寂靜。是無爲法。標相印。卽決定義。如說有爲。決定無常。善戒第七。地持第八。瑜伽四十六。廣有分別。言三印者。四中合罽入於無常。或除涅槃寂靜。有爲印故。今以諸印印於一切。亦無能印。故云不著。則入唯一實相印矣。鈔言五印者。卽同淨名。迦旃延章五非常觀。

然前四非常卽是有爲寂靜爲涅槃卽是無爲攝
爲無爲盡。又前四俗諦。後一真諦。言四印者。卽
莊嚴論第十一。名四法印。論云。四法印者。一者一
切行無常印。二者一切行苦印。三者一切法無我
印。四者受寂滅印。所以知合空入於無我者。論云。
此中應知無常印及苦印爲成無願。三昧依止。無
我印成空。三昧依止寂滅印爲成無相。三昧說此
法印爲三三昧依止故。或名優檀那者。卽地持第
八亦名優檀那。論云。有四優檀那。諸佛菩薩爲令
衆生得清淨故。故說爲四。云何爲四。一切行無常。

一切行苦。一切法無我。涅槃寂滅。諸佛菩薩具足
此法。復以此法傳受衆生。是名優檀那。過去寂滅
諸牟尼尊。展轉相傳。是名優檀那。菩薩藏經等者。
亦卽大寶積第三十六菩薩藏會第十二卷末。卽
試驗菩薩品。經云。舍利子。諸佛世尊。具大智力。總
攝諸法。安處四種。鄔陀南中。何等爲四。所謂一切
行無常。一切行苦。一切法無我。涅槃寂滅。舍利子。
所演一切行無常者。如來爲諸常想衆生。斷常想
故。所演一切行苦法者。如來爲諸樂想衆生。斷樂
想故。所演一切無我法者。如來爲諸我想衆生。斷

撰述
垂肩正金卷十八
我想故所演寂滅涅槃法者。如來爲諸任有所得
顛倒衆生斷有所得顛倒心故。舍利子。是諸菩薩
若聞如來說一切得爲無常者。則能善入畢竟無
常。若有聞說一切行罣。則能興起厭離願心。若聞
說諸法無我。則能修習空三摩地。妙解脫門。若有
聞說寂滅涅槃。則能修習無相三摩地。而不非時
趣入真際。如是舍利子。若諸菩薩摩訶薩。能善修
習如是法者。終不退失一切善法。速能圓滿一切
佛法。鄔陀南者。此云標相者。釋經也。言涅槃寂靜
是無爲法。標相者。畧舉亦應云。無常是有爲法。標

相。罣是有漏法。標相。無我是諸法。標相。亦有說言
鄔陀南者。唐言說也。佛常說故。義當無問。自說經
印卽決定者。諸有漏法。決定是罣。一切法決定無
我。無爲決定寂靜。善戒第七下畧示源由。地持第
八已如上說善戒第七者。經云。智有三種。一者能
捨外物。二者能捨內物。三者捨內外已。兼化衆生。
云何教化。見貧窮者。先當語言。汝能歸依於三寶
不。受齋戒不。若言能者。先授三歸。及於齋戒。後則
施物。若言不能。復應語言。若不能者。汝能隨我說
一切法無常。無我。寂滅涅槃不。若言能者。復當教

之教已便施。乃至云若能如是先教後施。是名大施。釋曰此卽次下云言三印者。四中合苦入於無常。卽智論所說三法印也。瑜伽四十六者。論云復次有四種法。嗚陀南諸佛菩薩欲令有情清淨。故說與地持同。地持卽瑜伽同本異譯耳。或除涅槃等者。此三唯說有爲。卽不合苦入無常也。言三者一無常。二苦。三無我也。然嗚陀南此云集施。應與鄔陀南異。今論亦云嗚陀南。或譯之少巧。此三卽涅槃三修。今以諸印下結前諸印。生後釋一印義。法華云。佛自住大乘者。卽第一經偈中。此前偈云。

唯此一事實。餘二則非真。終不以小乘濟度於衆生。

疏後四依理起行。七願護小心。故增廣大。八智護凡見。方順佛法。九自無法愛。十無作而修。故入無諍門矣。

佛子。復有十法。能令一切諸佛歡喜。何者爲十。所謂安住不放逸。安住無生忍。安住大慈。安住大悲。安住滿足諸波羅蜜。安住諸行。安住大願。安住巧方便。安住勇猛力。安住智慧觀。一切法皆無所住。猶如虛空。佛子。若諸菩薩住此十法。能令一切諸佛歡喜。

疏後十純熟究竟中行修成熟故云安任初二入
理行。一。加行離逸。二。正證捨相。次。二。救生行。次。二。
隨緣行。十度別修。諸行總攝。後四願智行。卽十度
後四也。亦可前十如次成此十種。但生熟之異耳。
思之。

佛子。有十種法。令諸菩薩速入諸地。何等爲十。一者
善巧圓滿福智。二行。二者能大莊嚴波羅蜜道。三者
智慧明達。不隨他語。四者承事善友。恒不捨離。五者
常行精進。無有懈怠。六者善能安住。如來神力。七者
修諸善根。不生疲倦。八者深心利智。以大乘法。而自

莊嚴。九者於地地法門。心無所住。十者與三世佛善
根方便。同一體性。佛子。此十種法。令諸菩薩入諸地
疏第二答入菩薩所任處問。文分爲三。初有十法
起入地行。次任地觀修。後明地要勝。今初列中。初
三。自分行。一。具資糧。二。成加行。一度具十名。大莊
嚴。三。智契實相。故不隨他。後七。起勝進行。謂四外
近良緣。五。內。須自策。六。能安果用。七。不厭修因。八。
雙游定慧。深心契寂。利智貫達。以斯二法。嚴於法
身。故法華云。佛自住大乘。如其所得法。定慧力莊
嚴。以此度衆生也。九。不住法門。住有二失。一。不契

地智。二不能進趣。不任反此。十善窮地體。謂依一佛智。方便多門。更無異體。

復次佛子。諸菩薩初任地時。應善觀察。隨其所有一切法門。隨其所有甚深智慧。隨所修因。隨所得果。隨其境界。隨其力用。隨其示現。隨其分別。隨其所得。悉善觀察。知一切法皆是自心。而無所着。如是知已。入菩薩地。能善安住。

疏二復次下。任地觀修。有十一句。初一是總。一切法門。是成地之法。次九為別。二諸地證智。二修加行因。四攝報等果。五所知分齊。及所化境。六進德

修業。斷障力用。七示自身等。八分別諸願。十善等法。九所證法界。皆言隨其者。諸地非一故。十悉善下。辨成觀相。皆自心者。智與心相應故。因由心學。果是心成。境由心現。力用是心分位。神通是心現起。分別是心決擇。所得是心造詣。並心外無得。何所著耶。十一如是下。結觀成益。鈔任地觀修者。依梁論云。地者對治義。

佛子。彼諸菩薩。作是思惟。我等宜應速入諸地。何以故。我等若於地地中任。成就如是廣大功德。具功德已。漸入佛地。任佛地。已能作無邊廣大佛事。是故宜

撰述
聖賢政金卷十八
應常勤修習。無有休息。無有疲厭。以大功德而自莊嚴。入菩薩地。

疏三佛子下。顯地要勝。標徵釋結文並可知。佛子。有十種法。令諸菩薩所行清淨。何等爲十。一者悉捨資財。滿衆生意。二者持戒清淨。無所毀犯。三者柔和忍辱。無有窮盡。四者勤修諸行。永不退轉。五者以正念力。心無迷亂。六者分別了知。無量諸法。七者修一切行。而無所著。八者其心不動。猶如山王。九者廣度衆生。猶如橋梁。十者知一切衆生。與諸如來同一體性。佛子。是爲十法。令諸菩薩所行清淨。

疏第三答大行清淨問。有二十句。初十是因。後十是果。今初行成出障。故云清淨。雖數名小異。大同十行。亦通十度。十行所行。卽是十度。欲勝進彼。故此前修。又下文由爲物說法。自增諸度。故復廣明。所望處別。互有影畧。前七可知。八於惡衆生修菩薩行。心不傾動。是難得中義。本願誓化故。九善法行中。與衆生爲清涼法池。大悲堅固。普攝衆生。爲舍爲歸。是廣度衆生。如橋梁義。有力能故。十真實行中文云。此菩薩入三世諸佛體性。與三世諸佛善根同等。智決體同故。鈔雖數名小異等者。以

撰述
書局正金卷十八
刊定不許通十行。故雙定之。彼云初四五七名同十行。餘並全別。不可懸指。次後有文具顯十度。釋曰。此公雖爲十度釋經。意明但是行法。亦非十行。亦非十度。故今雙定。俱是無過。次云十行所行卽十度者。明二義相成。俱明無失。次云欲勝進彼。故此前行者。別通十行。以其上意云。十行自是後位。何用懸指。今疏通云。夫勝進者。逆修後位。今十住勝進。正修十行。何有違耶。又下文由爲物下。通其不許十度。彼云下文自有十度。此是十度乃成重也。故今釋云。彼約說法成度。此約通修。所望旣差。

亦非繁重。彼唯前四名同。今取其後三說同。十行指文顯著。前七雙具。文理自顯。

菩薩旣得行清淨已。復獲十種增勝法。何等爲十。一者他方諸佛皆悉護念。二者善根增勝超諸等列。三者善能領受佛加持力。四者常得善人爲所依怙。五者安住精進。恒不放逸。六者知一切法平等無異。七者心恒安住。無上大悲。八者如實觀法。出生妙慧。九者能善修行。巧妙方便。十者能知如來方便之力。佛子是。爲菩薩十增勝法。

疏第二菩薩旣得下。由行淨因得勝法果。一他方

撰述
對處取金卷十八
三
勝二自善勝。三深定勝。四同行勝。五助道勝。六眞智勝。七意樂勝。八觀慧勝。九修行勝。十增進勝。佛子。菩薩有十種清淨願。何等爲十。一願成熟衆生。無有疲倦。二願具行衆善。淨諸世界。三願承事如來。常生尊重。四願護持正法。不惜軀命。五願以智觀察。入諸佛土。六願與諸菩薩同一體性。七願入如來門。了一切法。八願見者生信。無不獲益。九願神力住世。盡未來劫。十願具普賢行。淨治一切種智之門。佛子是爲菩薩十種清淨願。

疏第四答大願問。有二十句。初十起勝淨願。後十

勵志令滿。今初。全同初地十願。一成熟衆生願。二淨佛國土願。三供養。四護法。五承事。六同善根。七攝法上首。法通至佛。名如來門。八三業不空。九具修諸行。十現成正覺。但彼文廣。依彼次者。五七一。二。六八三九。四。十。爲今之次。鈔依彼次者。五七一。二。等。如次將今之十。以對彼十。此中第一。卽彼第五。是成熟衆生等。

佛子。菩薩任十種法。令諸大願皆得圓滿。何等爲十。一者心無疲厭。二者具大莊嚴。三者念諸菩薩殊勝願力。四者聞諸佛土。悉願往生。五者深心長久。盡未

來劫六者願悉成就一切衆生。七者任一切劫不以爲勞。八者受一切苦不生厭離。九者於一切樂心無貪著。十者常勤守護無上法門。

疏二佛子菩薩下。令願成滿者。由斯十句能滿前十及餘多願。於中五深心則可久。六悉成則可大。可久則菩薩之德。可大則菩薩之業。餘並可知。

鈔五深心等者。此則用周易繫辭繫辭云。乾以易

知。坤以簡能。天地之道不爲而善始。不勞而善成。故曰易簡。易則易知。簡

則易從。易知則有親。易從則有功。順萬物之情。故曰有親。通天下

之志。故曰有功。有親則可久。有功則可大。有易簡之德。則能成。可久可大。

功。可久則賢人之德。可大則賢人之業。天地易簡。其形聖人不爲。羣方各遂。其業德業。既成。則入於形器。故賢人目其德業也。易簡而天

下之理得矣。天地之理。莫不由於易。簡而各得。順其分位也。天下之理得

而成位乎其中矣。成位立象也。極易簡則能通天下之理。通天下之理。故能成象。

並乎天地也。言其中者。則明並天地也。但觀向引疏文。可見但取可

大。可久之言。而不取易簡之義。

佛子。菩薩滿足。如是願時。卽得十種無盡藏。何等爲

十。所謂普見諸佛。無盡藏。總持不忘。無盡藏。決了諸

法。無盡藏。大悲救護。無盡藏。種種二昧。無盡藏。滿衆

生心。廣大福德。無盡藏。演一切法。甚深智慧。無盡藏。

報得神通無盡歲。任無量劫無盡歲。入無邊世界無盡歲。佛子。是爲菩薩十無盡歲。

疏第五佛子已下。答復菩薩藏問。文亦有四。初是結前生後。謂以前行願。蘊積成歲。故唯十句。更無成熟等異。文有五對。並顯可知。鈔文有五對。並顯可知者。一見佛持法對。二智深悲廣對。三多定廣福對。四辨深通勝對。五豎末橫該對。

菩薩得是十種歲已。福德具足。智慧清淨。於諸衆生。隨其所應。而爲說法。

疏第六菩薩得是下。答隨所應化常爲說法問。文

分爲三。初結前生後。謂蘊積福智。用以攝生。

佛子。菩薩云何於諸衆生。隨其所應。而爲說法。

疏二佛子下。徵以標起。

所謂知其所作。知其因緣。知其心行。知其欲樂。

疏三所謂下。正解其義於中分二。前知器授法。二具德成益。初中先知器有四。一識習氣所作。如金師之子。應教數息等。二知種性因緣。聞法發心。爲因。隨因成性。遇師聞法。爲緣。隨緣成種。三知心行。之病。謂多貪等。四知希望差別。鈔如金師之子等者。涅槃經說。乃是身子差機。十地當引。今且引

莊嚴論說目連教二弟子。金師之子教不淨觀。浣衣之子教數息觀。久無所證。舍利弗問目連。汝以何法而教之乎。答以二觀。又問二人從何來。答一浣衣。一鍛金。身子云。鍛金之子應教數息。浣衣之子令修不淨。於是目連如法教之。卽得羅漢。卽說五頌歎身子云。第二轉法輪。佛法之大。將於諸聲聞中。得於最上智。又云。行自境界中。獲得所應得。行他境界中。如魚墮陸地。我常在河邊。習浣衣自淨。安心於白骨。相類易開解。不大加功力。速疾入我意。金師常吹囊。出入息是風。以其相類故。易樂

入安般。衆生所翫習。各自有勝劣。釋曰。上皆隨宜之意。

貪欲多者爲說不淨。瞋恚多者爲說大慈。愚痴多者教勤觀察。二毒等者爲說成就勝智法門。樂生死者爲說三苦。若著處所。說處空寂。心懈怠者。說大精進。懷我慢者。說法平等。多諂誑者。爲說菩薩其心質直。樂寂靜者。廣爲說法。令其成就。菩薩如是隨其所應而爲說法。

疏二貪欲下。知授法。文有十句。初二可知。三痴有二種。一迷於事理。教觀法相。二惡邪推求。不信業

因令其觀察十二因緣能離邪執自性等計。上三
唯對治四等分者。等謂相似。三觀不可並施。若等
重者。教觀勝義。謂姪欲卽道等。若等輕者。可以生
善爲人化之。釋此四分。具如雜集十三。五求人天
樂爲樂生死。說三苦者。乃至非想行苦所隨故。十
樂事寂者。令成理寂。若沈空寂。令成事用。菩薩已
下。總結隨宜。鈔釋此四分。具如雜集十三等者。
然此論建立補特伽羅。畧有七種。謂病行差別故。
出離差別故。任持差別故。方便差別故。果差別故。
界差別故。修行差別故。今當病行差別。自有七種。

一貪行。二瞋行。三痴行。四慢行。五尋思行。六等分
行。七薄塵行。言貪行補特伽羅者。謂有猛利長時
貪欲。標也雖於下劣可愛境界而能發起上品貪
欲。此釋猛利起卽長時無有斷滅。此釋長時如貪

行者乃至尋思行者。亦爾各隨自境猛利。長行如
理配釋。等分補特伽羅者。謂任自性煩惱。遠離猛
劣。任平等境煩惱故。隨境勢力。煩惱現行故。釋曰
猛揀前五。劣揀第七。任平等境。釋成自性。隨境勢
力煩惱現行。釋自性煩惱。謂勝境貪心則增。劣境
貪心則下。不同前五於下劣境起上品貪等。亦猶

顯述
聖賢正金卷十八
顏回怒不遷等。或與境等名爲等分。又於所起無偏勝劣。故云等等也。論云。薄塵行補特伽羅者。謂任自性位薄煩惱。如前所說自性位煩惱相。今此煩惱望彼微薄故。雖於增上所緣境界。而微薄性煩惱現行。昔所修習勝對治力。所摧伏故。釋曰。非如前等分。等於前境。境勝則貪重等。今勝亦劣。故不同前。則父母之讐。亦無加報。又上有七。經多說四者。取其二毒。爲不善根故。等分之中。攝餘三故。故云等等分。分其輕重。輕卽薄塵。重卽正是等分。旣等於境。望於薄塵。故爲重耳。又等皆相似。無有勝劣。

前三則有互增之義。五求人天樂爲樂生死。恐有難言。誰復樂死。故今答云。所謂樂生。以生必死。故人天之樂。是生死中事故。樂事寂者。卽爲人意下卽對治。

爲說法時。文相連屬。義無舛謬。觀法先後。以智分別。是非審定。不違法印。次第建立。無邊行門。令諸衆生。斷一切疑。善知諸根入。如來教證。真實際。知法平等。斷諸法愛。除一切執。常念諸佛。心無暫捨。了知音聲。體性平等。於諸言說。心無所着。巧說譬喻。無相違反。悉令得悟。一切諸佛。隨應普現。平等智身。

撰述
疏二爲說法時下。明具德成益。有十句十對。一文
連義正。二法智無差。卽依法不依人。依智不依識。
三審定無違。卽依了義經。不依不了義經。四立法
義故能徧斷疑。五了物根故入於佛教。六寂契真
際照法性源。七斷眞法愛除人法執。八念佛了音。
九亡言巧說。雖無說無示善順宗因。十令悟隨宜。
終歸平等。卽說之益。鈔一文連義正者。卽依義
不依文也。疏以文義顯故。更不釋之。第二句中。有
其兩對。卽依法不依人。依智不依識。具法四依也。
卽淨名經法供養品。而以義語智識了義不了義。

人法而爲其次。四依之義三門分別。一釋名。二出
體。三次第。初名者。義爲所詮。憑之起行。是故應依。
教雖詮理。要湏亡言。言非義故。智無分別。能決斷
故。是以應依。識爲了別。能起染著。故不應依。依了
義經。不依不了義者。顯實分明。名爲了義。憑之起
解。是故應依。隱覆有餘。名非了義。令人執滯。故不
應依。託法起行。是故湏依。不隨人情。故不依人。然
了義經等。乃有多門。一法印非印門。與無常寂靜。
無我三印相應。以爲了義。不與相應。卽非了義。二
大小乘門。小乘三印亦非了義。大乘方了。如七善

撰述
聖嚴師錄卷十八
知中。又涅槃第六云。若說如來無常變易名爲不了。若說如來常住不變。是名爲了。三顯密門。密意宣說。各爲不了。顯了說者。卽名爲了。四又於大乘言未周悉。名爲不了。周備爲了。此上四門。初一令物捨邪歸正。二捨小歸大。三捨密就顯。四令尋詮。使義周備。二出體者。初一所詮。通事通理。二卽能證。通根本後得。三約能詮。通詮上二。四約能說。忘情取法。三次第者。卽以上義以爲次第。餘可思也。七斷眞法愛者。謂眞實觀智。理事無違。心生愛著。便不證實。故諸聖人。少有所念。不得聖果。

菩薩如是爲諸衆生而演說法。則自修習增長義利。不捨諸度。具足莊嚴波羅蜜道。

疏第七菩薩如是下。答恒不捨離諸波羅蜜問。於中二。先結前生後。則正說法時。便具十度。設自修此。亦爲利他。一向大悲。了平等故。通至佛果。故皆名道。鈔設自修此等者。以此章門。標說法時。不捨諸度。而下釋相。於諸佛所聞法。近友等。亦有不因說法所成。故爲此通。設自修時。亦爲衆生。則不違躡前隨所應化常爲說法。

是時菩薩爲令衆生心滿足。故內外悉捨而無所著。

是則能淨檀波羅蜜。

疏二是時下。正示不捨度相。十度卽爲十段。皆先辨相。後是則下結名。前四辨相中。先辨施等相。後無著等辨波羅蜜相。

具持衆戒而無所著。永離我慢。是則能淨尸波羅蜜。疏檀戒可知。

悉能忍受一切諸惡。於諸衆生。其心平等。無有動搖。譬如大地。能持一切。是則能淨忍波羅蜜。

疏三忍中。諸惡通於內外。其心下契理平等。成波羅蜜。

普發衆業。常修靡懈。諸有所作。恒不退轉。勇猛勢力。無能制伏。於諸功德。不取不捨。而能滿足一切智門。是則能淨精進波羅蜜。

疏四精進中。普發衆業。是無餘修。亦利樂勤。常修靡懈。是長時修。恒不退轉。是無間修。上卽加行勤也。勇猛莫制。是勇捍修。亦被甲勤。於諸已下。是顯度相。鈔四精進中等者。此中攝於四修及三精進。故疏雙配細尋可知。

於五欲境無所貪著。諸次第定。悉能成就。常正思惟。不住不出。而能銷滅一切煩惱。出生無量諸三昧門。

撰述
華嚴疏鈔卷卅一
成就無邊大神通力。逆順次第入諸三昧。於一三昧門入無邊三昧門。悉知一切三昧境界。與一切三昧三摩鉢底智印不相違背。能速入於一切智地。是則能淨禪波羅蜜。

疏五禪定中。文有十一句。一訶五欲。所以訶者。夫禪定虛凝。湛猶停海。高攀聖境。尚曰妄情。馳想五塵。豈當爲道。云何訶之。色如熱金丸。執之則燒。聲如毒塗鼓。聞之必死。香如斃龍氣。嗅之則病。味如沸熱蜜。舐則爛傷。觸如臥師子。近之則嚙。此五欲者。得之無厭。如火益薪。亡國敗家。世世爲害。過於

寃賊。故不應著。况菩薩體。此卽如復何所著。鈔

一訶五欲者。卽天台止觀。依智論諸經。修正道前立二十五方便。謂一具五緣。二訶五欲。三棄五蓋。四調五事。五行五法。五五二十五。今此但明訶五欲耳。况菩薩下。三無訶相。直順經文。無貪著義。餘之方便。疏文不要。略示其名。言具五緣者。一持戒清淨。二衣食具足。三閑居靜處。四息諸緣務。五近善知識。言棄五蓋。前已有竟。調五事者。一調食。令不饑不飽。二調眠。不節不恣。三調身。令不寬不急。四調息。令不澁不滑。五調心。令不沉不舉。行五法

撰述
華嚴疏鈔卷十八
三
者。一欲。二精進。三念。四巧慧。五一心。並類前後。其相可知。

疏二入次第定。謂四禪四空。及滅受想。爲九次第定。下十地離世間品具明。卽一切門禪。鈔卽一切門禪者。瑜伽三十三說六度四等各有九門。謂一自性。二一切。三難行。四一切門。五善士。六一切種。七遂求。八此世他世樂。九清淨。故彼頌云。自性一切難。一切門善士。一切種遂求。二世樂清淨。又自性皆一。一切或二。或三。難行皆三。一切門皆四。善士皆五。一切種皆六。或七。遂求皆八。二世樂皆

九。清淨皆十。今九門靜慮者。一自性者。謂心一境性。或奢摩他品。或毘鉢舍那品。或雙運道。卽十句中二三及九。第二一切禪者。畧有二種。一者世間。二出世間。九次第定。通於世間。不住不出。是出世間。亦卽第二句攝。有三種者。一現法樂住禪。謂身心輕安。遠離憍舉。離諸愛味。泯一切相。二引生功德禪。三饒益有情禪。如疏已配。第三難行禪。有三種者。一已住深定。能引諸靜慮。而捨彼最勝。生於欲界。是第一難。卽經第五句。二依此靜慮。能發種種。超過二乘所行等持。亦第五句。故疏云。卽難行

攝述
國府政錄卷十八
相三依於靜慮。速證無上菩提。卽第十句。疏亦已指。第四一切門禪有四種者。謂一尋伺俱行。二喜俱行。三樂俱行。四捨俱行。卽第二句攝。故疏已指。第五善士禪畧有五種者。一無愛味。卽第三四句。餘四與四等相應。卽第八句攝。所緣境界。卽慈念衆生等故。第六一切種者。此靜慮有六種七種。總十三種。言六種者。一善靜慮。二無記變化靜慮。三奢摩他品。四毘鉢舍那品。五自他利。正審思惟。六能引神通威力功德。亦是第六引神通句。亦通餘句。言七種者。一名緣靜慮。二義緣。三止相緣。四舉

支那
華嚴疏鈔卷十八
相緣。五捨相緣。六現法樂住。七饒益他。隨句相應配之可知。第七遂求者。滿衆生意故。亦神通句攝。畧有八種。此一段論文稍廣。今義引之。一能息諸毒等。二能除衆病。三降雨止饑。四濟諸怖畏。五能施飯食。六能施資財。七能正諫誨。八能正造作。隨應可知。第八此世他世樂靜慮有九者。一神通變現調伏有情靜慮。二記說變現調伏有情。三教誨變現調伏有情。四於造惡者示現惡趣。五於失辨者能施辨才。六於失念者能與正念。七製造建立無顛倒論等。八於世工巧能隨造作。九放光息苦。

後二亦義引亦隨應配之第九清淨禪有十疏下自配餘度九門十行品說

疏三安任理定寂愛味任智契不出名正思惟以見心性故亦善士相上二定體卽定自性餘六定用四消滅煩惱通愛見慢等故云一切卽清淨相鈔三安任理定寂愛味任者雜集第九云如是靜慮無色由四種相應廣分別謂雜染故清白故建立故清淨故雜染者謂四無記根一愛二見三慢四無明由此四惑染汚其心於諸染汚靜慮定門令色無色界一切有覆無記煩惱及隨煩惱

生長不絕釋曰上卽畧釋論文下別釋中其文廣博今畧取意謂由有愛味上靜慮由有見故見上靜慮由有慢故恃上靜慮由無明故疑上靜慮如是煩惱常染其心令色無色大小二惑相續流轉等論云清白者謂清淨靜慮無色自性善故說名清白雖是世間離纏垢故亦名爲淨建立謂支建立等至建立品類建立名想建立於諸靜慮具四建立諸無色中唯有三種除支建立支建立者取意謂初禪五支等言等至建立者謂七種作意入初靜慮乃至非想言品類建立者於初靜慮具三

品熏修。八定皆是故。初四禪。隨三品因。各有三天。名想建立者。謂靜慮中無量名字。不可筭數。以諸佛世尊所入。二乘所不能知故。乃至八定。互相攝等。論云。清淨者。謂初靜慮中邊際定力。乃至非想非非想處邊際。是名清淨。彼疏釋云。八定之中。所有最後邊際。由作用自在。離無堪任。郭故。名清淨。通有漏無漏。但自在作用。俱名清淨。釋曰。今疏三四。卽離前雜染。四無記根。是第四清淨。五至八。卽是前名想建立中。互相攝故。及品類建立等。餘可思之。

疏五出生諸定。如起信云。得此真如三昧。能生無量諸三昧門。上文云。一三昧生塵等定是也。卽難行相。鈔出生諸定者。卽雜集名想建立疏中。先明能出生。卽依起信修行信心分中之文。前云。久習淳熟。乃至得入真如三昧。次論又云。復次。依是三昧故。則知法界一相。謂一切諸佛法身。與衆生身平等無二。卽名一行三昧。當知真如是三昧根本。若人修行。漸漸能生無量三昧。經言無量三昧者。如智論云。五智印等三萬。五千。首楞嚴等五萬三千。方便善巧。無量無邊。

疏六引發神通謂精義入神以致用也亦遂求相
七逆順自在亦難行相從滅定出入非非想乃至
初禪是名爲逆從初禪出入第二禪乃至滅定
是名爲順此中逆順應各有超間謂超一超二乃至
全超文無者畧此亦名爲師子游步三昧鈔
此中逆順等者俱舍定品云二類定順逆均間次
及超至間超爲成三洲利無學謂本善等至分爲
二類一者有漏二者無漏往上名順還下名逆今
疏已委釋又彼云同類名均異類名間相隣名次
越一名超至間超爲成者明修超也謂觀行者修

超定時先於有漏八地等至順逆均次現前數習
次於有漏順逆均超現前數習次於無漏順逆均
超現前數習是名修習加行滿也後於有漏無漏
等至順逆間超名超定成三洲利無學者明處及
人修超等至唯人三洲處也仍是利根不時羅漢
方能修也今明菩薩居然能超如順超從初禪出
應入二禪而入三禪則是超一若從初出而入四
禪卽是超二直入滅定是謂全超逆超亦爾此亦
名爲師子等者騰躍跳躑故卽智論百八三昧中
第三名也菩薩得是三昧於一切三昧中入出遲

速皆得自在。譬如衆獸遊戲之時。若見師子。率皆怖懼。師子戲時。於諸羣獸強者。則殺伏者。則放。菩薩亦如是。得是三昧。於諸外道強者。破之。信者度之。故名師子遊步三昧第一。

疏八一多自在。攝一切定。應有四句。謂在一入一。在一入一切。在一切入一。在一切入一切。得其源故。

疏九悉知定境。定境有三。一諸定所緣。二諸定分齊。三諸定境用。皆能知之。

疏十者。總結體用無違。言三昧者。此云等持。唯局

有心而通散心。三摩鉢底。此云等至。通於有心及與無心。唯諸位定體。此二功德。各爲等引。上二句定體。通於此三。六句定用。卽是所引。言智印者。卽一實相。故智論釋百八三昧中。第二名寶印三昧。謂與實相般若相應故。上二是定。此一是智。合卽雙運。今菩薩隨在一定。卽與一切三昧。此三無違。鈔百八三昧。名離著虛空不染。初一名首楞嚴。第二名寶印三昧者。智度論云。能印諸三昧。於諸寶中。法寶是寶寶。今世後世。乃至涅槃。能爲利益。如佛語比丘云。爲汝說法。所謂法印。法印是寶。是

撰述
寶藏疏鈔卷十八
三
解脫門。若三藏教門。以三法印爲法印。若摩訶衍。但有諸法實相。一法印。與實相般若相應。三昧。名爲寶印三昧也。

疏十一。速入智地。亦卽定果。以菩薩之定。事窮無邊。理極無際。故能速至一切智地。亦難行相。亦二世樂相。

疏又上二三四。卽現法樂住禪。次五引生功德禪。五亦饒益有情禪。後二通三。鈔又上二三下。上按文釋。今以三禪收之。以諸經論多用三故。如初會說。今當重釋。瑜伽四十三云。云何菩薩一切靜

慮。謂此靜慮。畧有二種。一者世間。二者出世間。復有三種。一者現法樂住等。論釋云。若諸菩薩所有靜慮。遠離一切分別。皆生身心輕安。最極寂靜。遠離掉舉。離諸凌味。泯一切相。當知是名現法樂住。若諸菩薩所有靜慮。能引能住種種殊勝。不可思議。不可度量。十方種性所攝等持。乃至若諸菩薩所有靜慮。能引能住一切菩薩解脫勝處徧處。無碍解。無諍願等。不共功德。各能引等持功德。靜慮。若諸菩薩所有靜慮。於諸有情。能引義利。彼彼事業。與作助伴。下取意引。息苦除怖。救護讚三寶德。

調伏有情爲第三靜慮。

疏又通十種清淨。一由世間淨。離諸愛味故。卽第三句。二出世間淨。亦此句攝。三加行淨。卽是初句。四得根本淨。卽第二句。五根本勝進淨。卽第五句。六入任出自在清淨。七捨靜慮已。復還證入自在清淨。上二卽第七句。八神通變現自在清淨。卽第六句。九離一切見趣清淨。十一切煩惱所知障清淨。此二共是第四句攝。餘如瑜伽四十三。九大禪說。十行之中。當顯其相。鈔又通十種下。卽九門中第九也。

於諸佛所聞法受持。近善知識承事不倦。常樂聞法。心無厭足。隨所聽受。如理思惟。入真三昧。離諸僻見。善觀諸法得實相印。了知如來無功用道。乘普門慧。入於一切智智之門。永得休息。是則能淨般若波羅蜜。

疏六般若中句亦有十。前之三句聞法近友。卽聞所成慧。初句正明。二近友不倦。是聞慧緣。三樂聞無厭。是聞慧因。慧聞則已。慧不生故。四卽思慧。學而後思。故云隨所聽也。內正作意。故云如理。五亦思擇慧。又於無煩惱中。善決擇故。捨煩惱故。六善

撰述
華嚴疏鈔卷十八
觀下皆是修慧。此句悟入於如。七宿習思量故。了無功用道。八周備悟入。一中一切等。名爲普門。九入二智門。十總結已圓。故云休息。後三連環。鈔後三連環者。以經云一乘普門慧。二入於一切智智之門。三永得休息。此三乃似一句耳。故云連環而義則別。故爲三句。

疏此中亦有九門之相。恐繁不配。鈔此中亦有九門下。料揀有二。一對九門般若。

疏其中雖定慧互有。互相嚴故。而爲門不同。若全雙運。故起信論合於六度以爲五門。鈔其中雖

定慧下。二揀濫以互有故。於中有六。一對前定門。揀如前中云。知三昧境。不違智印。入於智地。是定中慧。慧資定也。今此中有入真三昧。是定資慧也。若全下。引證成前。既合定慧。明必相資。

疏後之方便。義亦準此。涉有不迷於空。則名方便。不厭有而觀空。便稱般若。豈令般若不能知有耶。方便若不觀空。何名方便。鈔後之方便下。以六對七料揀。二亦相成。

疏非唯此三。萬行皆爾。况般若能成萬行。何法而不用之。寂照盡於理極。不得一行無此君耳。所以

開則萬行森然。泯則一不爲一。得意則無所不通耳。鈔五非唯此三下。總結萬行相資之義。况般若下。况結深玄。言不得一行無此君者。借外典語。晉書中說王獻之好竹。到處卽皆樹之。人問其故。答云。人生不得一日無此君耳。意在虛心貞節。歲寒不移。今明萬行不得暫時而無般若。

示現一切世間作業。教化衆生而不厭倦。隨其心樂而爲現身。一切所行皆無染著。或現凡夫。或現聖人所行之行。或現生死。或現涅槃。善能觀察一切所作。示現一切諸莊嚴事。而不貪著。徧入諸趣。度脫衆生。

是則能淨方便波羅蜜。

疏七方便中亦有十種。一巧智現世爲方便。二悲非愛見。故化而無厭。卽悲智相導爲方便。三依體起用。四非捨非受。故一切無染。五凡聖雙行。由雙非故。六行無任道。七觀察進趣。八現相不著。九徧入諸趣。卽無生現生。十度脫衆生。是無化現化。初九拔濟。餘皆迴向。依瓔珞因果品。後之四度。亦各有三方。便三者。一進趣方便。卽第七句。二巧會有無。除第四句。皆此所攝。三不捨不受。卽第四句。鈔依瓔珞下。通明後四之相。後之三度。皆有收束。

及通明相二段可知。

盡成就一切衆生。盡莊嚴一切世界。盡供養一切諸佛。盡通達無障礙法。盡修行徧法界行。身恒住盡未來劫智。盡知一切心念。盡覺悟流轉還滅。盡示現一切國土。盡證得如來智慧。是則能淨願波羅蜜。

疏八願中。亦有十願。前五後三。盡字爲初。六身恒住盡劫海。七智盡心海。八窮盡有支。九盡現國土。十窮佛果智。此求菩提前九利樂。若依三願。二三四五爲自行願。六七爲神通。初及八九爲外化願。十通二利。皆云盡者窮彼源故。

具深心力。無有雜染。故具深信力。無能摧伏。故具大悲力。不生疲厭。故具大慈力。所行平等。故具總持力。能以方便。持一切義。故具辨才力。令一切衆生歡喜滿足。故具波羅蜜力。莊嚴大乘。故具大願力。永不斷絕。故具神通力。出生無量。故具加持力。令信解領受。故是則能淨力波羅蜜。

疏九力中。十句各二。謂標名釋義。一契理深心。是思擇力。染則無力。翻此故有。餘可準知。皆修習力。瓔珞有三。皆名通力。一報通力。二修通力。三變化通力。觀彼似當九十二句耳。

撰述
華嚴疏鈔卷十八
知貪欲行者。知瞋恚行者。知愚痴行者。知等分行者。知修學地行者。一念中知無邊衆生行。知無邊衆生心。知一切法真實。知一切如來力。普覺悟法界門。是則能淨智波羅蜜。

疏十智度中。識病知根。順理授法。名爲智度。亦有十句。初四知病輕重。次三知根欲樂。一位。二行。三心。後三知法藥。一知理法。二知果法。三普覺法界。前七成就有情。後三現法樂住。瓔珞三智。一無相智。卽知法真實。三變化智。卽如來力。餘皆第二一切種智。餘義如初會說。

佛子。菩薩如是清淨諸波羅蜜時。圓滿諸波羅蜜時。不捨諸波羅蜜時。任大莊嚴菩薩乘中。隨其所念一切衆生。皆爲說法。令增淨業而得度脫。

疏第八佛子下。答前所念衆生。咸令得度。問於中分三。初結前起後。二正明化度。三結如本誓。前中初結前清淨。約離障圓滿。具事理不捨。謂常相應。任大莊嚴者。總結十度爲嚴。是大乘體。後隨其所念下生後。由具前故。

墮惡道者。教使發心。在難中者。令勤精進。多貪衆生。示無貪法。多瞋衆生。令行平等。著見衆生。爲說緣起。

聖迹
華嚴疏鈔卷十八
聖
欲界衆生教離欲恚惡不善法。色界衆生爲其宣說
毘鉢舍那。無色界衆生爲其宣說微妙智慧。二乘之
人教寂靜行。樂大乘者爲說十力廣大莊嚴。

疏二墮惡道下。正明化度。文有十句。約爲四類。初
一令離惡果。三塗除無間。皆容發心。如慈童女。二
令勤修。則脫八難。值佛聞法。次三令離惡因。貪有
二種。上偏語色貪。教修不淨。今通語貪財名等。故
但云示無貪法。無貪法者。謂不淨觀空。少欲知足。
二瞋亦二種。上偏語能爲違害。故令修慈。今通瞋
情非情。故觀同體。不應自瞋。三痴亦三種。已如上

明。此約邪痴。令觀緣起。次三令離流轉。三界循環
皆可厭故。初欲恚害等。義見三地。二色界雖定慧
似均。然是定地。恐其滯寂。故爲說觀。又無生正觀
令得無漏。三無色定多。故爲說妙慧。又示諦觀。方
得永出。後二示以三乘。隨機爲說。又引權歸實。令
知本寂。鈔如慈童女者。智度論說慈行童女。入
海采寶。辭白其母。母不從志。相別誤傷。母一莖髮。
便墮火盆地獄。自省無罪。獄主具示罪相。便發大
心。見諸罪人。知同此罪。便請火盆。普爲戴之。獄主
瞋恚。以鐵叉擊頭。尋便命終。生於天上。貪有二種

等者畧有此二。然準瑜伽二十六中總有五種。論云。貪有五種。一於內身欲欲貪。二於外身姪欲。三境欲境貪。四色欲色貪。五薩迦耶欲薩迦耶貪。釋曰。慈恩解初貪有二。一云於自內身。初起欲界微少之欲。故名欲欲。次起重貪。故名欲貪。二云內身是自所欲之法。所以言於內身欲。於內身欲上起欲故。卽能欲心。此名欲貪。則初一欲字是所欲。第二是能欲。第三欲字是結名。釋曰。後解爲勝。濮陽兩解。初一同大乘法師後解。二云初之欲字。義同於前。次一欲字。卽別境欲。與貪俱時。緣於

所欲緣欲之欲。重云欲欲。後之一字。亦是所欲。緣欲之貪。名爲欲貪。釋曰。此解不及前。以後一皆有別境欲故。然古後四皆通二解。思之可知。今亦存一。今此雖二。亦以攝五色貪卽初二。財名等卽後三。財卽三四。名兼第五。等卽等三耳。

如其往昔初發心時。見無量衆生。墮諸惡道。大師子吼。作如是言。我當以種種法門。隨其所應。而度脫之。菩薩具足如是智慧。廣能度脫一切衆生。

疏三如其往昔下。結如本誓。故能真度。師子吼者。決定度故。

佛子。菩薩具足如是智慧。令三寶種永不斷絕。所以者何。菩薩摩訶薩教諸衆生發菩提心。是故能令佛種不斷。常爲衆生開闡法藏。是故能令法種不斷。善持教法無所乖違。是故能令僧種不斷。復次。悉能稱讚一切大願。是故能令佛種不斷。分別演說因緣之門。是故能令法種不斷。常勤修習六和敬法。是故能令僧種不斷。復次。於衆生田中下佛種子。是故能令佛種不斷。護持正法。不惜身命。是故能令法種不斷。統理大衆。無有疲倦。是故能令僧種不斷。復次。於去來今佛所說之法。所制之戒。皆悉奉持。心不捨離。是

故能令佛法僧種永不斷絕。

疏第九佛子下。答前紹三寶種使不斷絕問。文分爲二。初仍前總標。二所以下。徵釋所由。由化衆生入三寶海。故能紹前。令不斷也。文有四番。爲成十句。前九別明。後一總結。就初三番釋通。總別。然皆後後轉深。前前通者。通在諸位。別者。初在十信。次居三賢。後約登地。疏三番佛種。差別云何。初教發心。令具因性。未發。唯有本住性。故次讚大願。令成因行。令所發心不退轉。故言大願者。謂求菩提願。利樂有情願。又防

毘沙
善廣疏鈔卷十八
惡願如戒經說有進善願如常所明三下佛種子
令成佛智謂證真如成無漏故上約別顯通者
發菩提心總有三心謂卽大悲大願大智初番爲
總已含大悲次番是願後番是智謂示妙理令慧
見心性成金剛種鈔又防惡願等者梵網經云
發十願已持佛禁戒作是願言寧以此身投熾然
猛火大坑及上刀山終不以毀犯三世諸佛經律
與一切女人作不淨行有十二願兼結云願一切
衆生皆得成佛爲十三願
疏三番法種差別相者初開法歲令教不斷次說

因緣令義不斷後具四種護令教理行證皆悉不
斷復次初雖領教未發真解次具解行未能證故
疏三番僧種有何差別初受法無乖始墮僧數次
修六和敬解行已成後統理大衆令僧清淨復次
初雖奉教解行未具未是真和次雖具解行未離
衆怖不能控御言六和者三業爲三及戒見利謂
身和同集口和無諍意和無違見和同解戒和同
奉利和同均又約菩薩三業同慈六皆同體真實
和也一切恭敬令僧久住鈔言六和者下別釋
六和敬先依律釋正在小乘義通大小又約菩薩

撰述
華嚴疏鈔卷十八
下。後約菩薩明。則外同他善。謂之爲和。內自謙卑。名之爲敬。言三業同慈者。大小異故。又三名行和。無有利和。一同戒和敬。菩薩通達實相。知罪不可得。爲欲安立衆生。於實相理。以戒方便。巧同一切。持諸戒品。無有乖諍。亦知衆生同此戒善。不斷不常。未來必得菩提大果。是以敬之如佛。故說同戒。以爲和敬。二同見和敬。菩薩通達實相。不得諸法。不知不見。爲欲安立衆生。於實相正見。方便巧同一切。種種知見。無有乖諍。亦知衆生因此知見。分別增進開解。必得種智圓明。是以敬之如佛。故說

同見以爲和敬。三同行和敬。菩薩通達實相。無念無行。爲欲安立衆生。於實相正行。方便巧同一切。修種種行。無有乖諍。亦知衆生因此諸行。漸積功德。皆當成佛。是以敬之如佛。故說同行爲和敬。四身慈和敬。菩薩住於無緣大慈。以修其身慈善根力。能不起滅定。現諸威儀。與一切樂。故身與九道和同。亦知前所得樂。衆生悉有佛性。未來必定當得金剛之身。是以敬之如佛。故說身慈以爲和敬。五口慈和敬。菩薩以無緣平等大慈。以修其口慈善根力。能不起滅定。普出一切音聲言詞。與一切

樂。故口與九道同。亦知前所得樂。衆生悉有佛性。未來必定當得無上口業。是以敬之如佛。故說口慈爲和敬。大意慈和敬。菩薩之心。常在無緣大慈三昧。以修於意慈善根力。能不起滅定。現諸心意。與衆生樂。故意與九道同和。亦知前所得樂。衆生悉有佛性。如來藏理。未來必定當得心如佛心。是以敬之如佛。故說意慈爲和敬也。

疏後總句者。弘法奉戒。三學兼修。則不斷三寶。化化不絕。

菩薩如是紹隆三寶。一切所行無有過失。

疏第十菩薩如是下。答前善根方便皆悉不空問。先畧後廣。畧中分三。初結前生後。謂由能紹三寶。故所行無失。

隨有所作。皆以廻向一切智門。是故三業皆無瑕玷。疏二隨有下。由不空故。三業無瑕。謂所作廻向是不空業。

無瑕玷。故所作衆善。所行諸行。教化衆生。隨應說法。乃至一念。無有錯謬。皆與方便智慧相應。悉以向於一切智智。無空過者。

疏三無瑕玷故下。由無瑕故。不空所作。反覆相成。

玉之內病曰瑕。瑕謂體破。外病曰玷。玷謂色汗。以顯三業內外無失。故白圭之玷。尚可磨也。三業之玷。不可爲也。鈔白圭下。見詩大雅抑篇。曰白圭之玷。尚可磨也。斯言之玷。不可爲也。毛傳云。玷。缺也。論語記南容三復白圭。謂其誦詩至此。二復讀之意。在謹言。雋永鄭重。今疏側用。故加三業。疏初句牒前。次所作下。示無瑕相。後皆與下。顯不空相。方便有慧。方便不空。慧有方便。慧亦不空。此辨所行不空。廻向智智。辨趣果不空。鈔方便不空者。卽側用淨名有慧。方便解句。下句卽有方便。

慧解。卽涉有不迷於空。是方便有慧。觀空不迷於事。卽慧有方便也。

菩薩如是修習善法。念念具足十種莊嚴。何者爲十。所謂身莊嚴。隨諸衆生所應調伏而爲示現。故語莊嚴。斷一切疑。皆令歡喜。故心莊嚴。於一念中入諸三昧。故佛刹莊嚴。一切清淨。離諸煩惱。故光明莊嚴。放無邊光。普照衆生。故衆會莊嚴。普攝衆會。皆令歡喜。故神通莊嚴。隨衆生心。自在示現。故正教莊嚴。能攝一切聰慧人。故涅槃地莊嚴。於一處成道。周徧十方。悉無餘。故巧說莊嚴。隨處隨時。隨其根器。爲說法。故

菩薩成就如是莊嚴於念念中身語意業皆無空過
悉以廻向一切智門。

疏第二菩薩如是下。廣明有二。初明自業不空。後
辨利他不空。初中雖明不空。義兼無失。以一切清
淨離煩惱故。又此無失。卽自業不空。順止寂故。文
有標徵釋結。釋中皆先標後釋。初四依正莊嚴。次
六攝化莊嚴。言涅槃地者。以涅槃嚴地也。謂隨有
成道入涅槃處。當知其地。卽是金剛。今於一切處
成。則無非金剛也。標云涅槃。釋云成道。文影畧耳。
鈔涅槃嚴地也。卽涅槃經文。下當廣引。在文

可見。

若有衆生見此菩薩。當知亦復無空過者。以必當成
阿耨多羅三藐三菩提故。若聞名。若供養。若同住。若
憶念。若隨出家。若聞說法。若隨喜善根。若遙生欽敬。
乃至稱揚讚歎名字。皆當得阿耨多羅三藐三菩提。
佛子。譬如有藥。名爲善見。衆生見者。衆毒悉除。菩薩
如是成就此法。衆生若見。諸煩惱毒。皆得除滅。善法
增長。

疏二若有衆生下。利他不空。於中有法喻合。文則
可知。佛與菩薩俱益不空。今不見者。不宜見故。見

不益者。無行力故。亦遠益故。上來並答所成之行問竟。

佛子。菩薩摩訶薩。住此法中。勤加修習。以智慧明。滅諸癡暗。以慈悲力。摧伏魔軍。以大智慧。及福德力。制諸外道。以金剛定。滅除一切心垢煩惱。以精進力。集諸善根。以淨佛土。諸善根力。遠離一切惡道諸難。以無所着力。淨智境界。以方便智慧力。出生一切菩薩諸地。諸波羅蜜。及諸三昧。六通。三明。四無所畏。悉令清淨。以一切善法力。成滿一切諸佛淨土。無邊相好。身語及心。具足莊嚴。以智自在。觀察力。知一切如來。

力無所畏。不共佛法。悉皆平等。以廣大智慧力。了知一切智智境界。以往昔誓願力。隨所應化。現佛國土。轉大法輪。度脫無量無邊衆生。

疏第二佛子菩薩摩訶薩住此下。答行所成德問。前文有二。今亦二段。第一答以行成因德。二答以因成果德。今初具答十二問。各有二句。上句答下句。上云修何滅痴。今答以智。他皆倣此。二用慈降魔。夫欲害人。反招自害。苟欲安人。則物我俱安。故柔勝剛。弱勝強。以慈安一切。惡魔無以施害。慈善根力。其功巨量。三福則怖之。以威智則屈之。以辨。

次四後四文並可知。八以方便智慧出生是答。一切菩薩已下卽是所問。準上文中此有七事。今波羅蜜下欠總持句。然方便有二。若加行方便。出生地度。若善巧方便。亦生諸度。及餘五法。智亦有二。若根本智。卽成內證。若後得智。卽成業用。是故此二。出生此七。言清淨者。治彼障故。鈔故柔勝剛等者。卽借老子道經云。柔弱勝剛強。御注云。柔順可以行權。權行卽能制物。故知柔弱者必勝剛強。德經云。天下之至柔。馳騁天下之至堅。御注云。天下之至柔者。正性也。若馳騁代勝。染雜塵境。情欲

充塞。則爲天下之至堅矣。若河上公意。意與前同。亦以柔能馳堅。如水能穿石。今疏意在此。若根本智卽成內證等者。七事皆有內證及業用故。佛子。菩薩摩訶薩勤修此法。次第成就諸菩薩行。乃至得與諸佛平等。疏二佛子下答。以因成果問。於中亦二。先結因成果。謂但勤修上來諸行。則能次第從因得果。於無邊世界中爲大法師。護持正法。

疏二於無邊世界下。正答所成之德。謂護持正法。但當勤修上來以行成。因之德。自當成後護持法。

等諸德。故乘前結因。成德明之。答上十句。文分九段。第一答初總句。如來法藏守護開演。

一切諸佛之所護念。

疏二佛所護念故。則答衆魔外道無能沮壞。以佛護故。

守護受持廣大法藏。獲無礙辨。深入法門。

疏三守護受持下。答攝持正法。無有窮盡。

於無邊世界大衆之中。隨類不同。普現其身。色相具足。最勝無比。以無碍辨。巧說深法。其音圓滿。善巧分布。故能令聞者入於無盡智慧之門。

疏四於無邊下。答於一切世界中演說法時。十王敬護。謂身勝音巧。令聞者入智故。

知諸衆生。心行煩惱。而爲說法。所出言音。具足清淨。故一音演暢。能令一切皆生歡喜。

疏五知諸衆生下。答舉世同欽。稱機令喜故。

其身端正。有大威力。故處於衆會。無能過者。

疏六其身端正下。答菩薩慶敬。端正有德故。其佛灌頂。在前第二佛護之中。

善知衆心。故能普現身。善巧說法。故音聲無礙。得心自在。故巧說大法。無能沮壞。得無所畏。故心無怯弱。

於法自在故無能過者。於智自在故無能勝者。般若波羅蜜自在故所說法相不相違背。辨才自在故隨樂說法相續不斷。陀羅尼自在故決定開示諸法實相。辨才自在故隨所演說能開種種譬喻之門。大悲自在故勤誨衆生心無懈怠。大慈自在故放光明網悅可衆心。

疏七善知衆生下。答得善根力增長白法。於中先總明三業後得心下。別顯十種自在皆是善根。其十自在之能並是增長白法。

菩薩如是處於高廣師子之座。演說大法。唯除如來及勝願智諸大菩薩。其餘衆生無能勝者。無見頂者。無映奪者。欲以難問令其退屈。無有是處。

疏八菩薩如是下。答開演如來甚深法藏。

佛子。菩薩摩訶薩得如是自在力已。假使有不可說世界量廣大道場。滿中衆生。一一衆生威德色相皆如三千大千世界主。菩薩於此纔現其身。悉能映蔽。如是大衆。以大慈悲安其怯弱。以深智慧察其欲樂。以無畏辨爲其說法。能令一切皆生歡喜。

疏九佛子菩薩得如是下。答攝持正法以自莊嚴於中初明自嚴。

撰述
聖嚴師金卷十八
何以故佛子。菩薩摩訶薩成就無量智慧輪故。成就無量巧分別故。成就廣大正念力故。成就無盡善巧慧故。成就決了諸法實相陀羅尼故。成就無邊際菩提心故。成就無錯謬妙辨才故。成就得一切佛加持深信解故。成就普入三世諸佛衆會道場智慧力故。成就知三世諸佛同一體性清淨心故。成就三世一切如來智。一切菩薩大願智能作大法師開闡諸佛正法藏及護持故。

疏次徵後釋。以攝正法故。有十句德。亦即是前所成之德。可思準之。鈔亦即是前所成之德者。卽

牒前文十種自在。總別諸句。初智慧輪。卽牒前總句。成就三業智爲導故。次之九句。牒十自在。但一二不次。一成巧分別。卽牒前第一得心自在故。巧說大法。二廣大念力。卽第二無畏自在。三善巧智慧。卽第三於法自在。及第四於智自在。由巧慧了法故。故合其二。四實相總持。卽第七陀羅尼自在。五成菩提。却是第五般若自在。般若爲先故。六無錯謬辨。卽第六辨才自在。七得佛加持。卽前第八隨所演法。開譬喻門。八普入佛會。卽大悲自在。誨生不倦。九同一體性。卽第十大慈自在。同體慈故。

第十一句作大法師。即總結前十。

爾時法慧菩薩欲重宣其義承佛神力而說頌言

心住菩提集眾福。常不放逸植堅慧。正念其意恒不

忘。十方諸佛皆歡喜。

念欲堅固自勤勵。於世無依無退怯。以無諍行入深

法。十方諸佛皆歡喜。

疏第二重頌分。十頌分二。初六偈頌前十種所成

行體。後四偈頌行所成德。前中初二偈頌佛喜。於

中初半頌不放逸餘頌佛喜。

佛歡喜已堅精進。修行福智助道法。入於諸地淨眾

行。滿足如來所說願。

疏二有一頌頌入地及大行大願。

如是而修獲妙法。既得法已施羣生。隨其心樂及根

性。悉順其宜為開演。

疏三一頌頌菩薩藏及所應化而為說法。

菩薩為他演說法。不捨自己諸度行。波羅蜜道既已

成。常於有海濟羣生。

疏四一頌頌不捨自行諸度及所念眾生皆令得

度。

晝夜勤修無懈倦。令三寶種不斷絕。

疏五半頌頌不斷三寶

所行一切白淨法悉以迴向如來地。

疏六半頌頌善根方便皆悉不空。

菩薩所修衆善行普爲成就諸羣生令其破暗滅煩惱降伏魔軍成正覺。

疏二菩薩所修下頌行所成德初一頌初行所成因果。

如是修行得佛智深入如來正法藏爲大法師演妙法譬如甘露悉霑灑。

慈悲哀愍徧一切衆生心行靡不知如其所樂爲開

闡無量無邊諸佛法。

疏後有三偈頌以因成果德於中初二頌通頌前之八段。

進止安徐如象王勇猛無畏猶師子不動如山智如海亦如大雨除衆熱。

疏後一頌別頌第九答攝持正法以自莊嚴以喻而顯一身儀安諦頌前現身次辨德威猛頌前以無畏辨三心定不動頌安其怯弱四智深如海頌以深智慧五法雨滅障頌前而爲說法

時法慧菩薩說此頌已如來歡喜大衆奉行。

撰述

華嚴疏鈔卷十八

疏

律

疏第三時法慧下明結說分謂契理合機故佛喜
衆奉也第三會竟。

信士趙汝璧募銀十兩刺此一卷

大方廣佛華嚴經疏鈔卷十八

終



工ノ本
二十四

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9